


穀玉類編

卷三十四至
卷三十八

AE
4
W284
V.8



EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5



穀玉類編卷三十四

休寧 汪兆舒果齋輯

儀表類

丰美

長

醜陋

美婦

醜婦

貌肖

胃腹

耳

目

鼻

口

唇齒

髮

鬚

手

足

夢

笑

哭

行

卧

丰美

陸子春姿容如玉。威儀秀異。光武嘗登臺見而偉之。歎曰。南方故

多佳人。世說

何平叔美姿儀。面至白。魏明帝疑其傅粉。正夏月。與熱湯餅。既噉。大汗出。以朱衣自拭。色轉皎然。

裴楷風神高邁。容儀俊爽。時人謂之玉人。又稱見裴叔則。如近玉山。照映人也。晉書

衛玠風神秀異。總角乘羊車入市。見者皆以爲玉人。觀之者傾都。夏侯湛美容觀。與潘岳友善。每行止。同輿接茵。京都謂之連璧。潘岳美姿儀。挾彈出洛陽道。婦人遇之者。皆連手縈繞。投之以果。遂滿車而歸。

杜乂美姿容。王羲之見而目之曰。膚若凝脂。眼如點漆。此神仙人也。桓彝亦曰。衛玠神清。杜乂形清。

王恭美姿儀。或目之云濯濯如春月。柳嘗被鶴氅裘。涉雪而行。孟昶窺見之。歎曰。此神仙中人。

孟顗。衛將軍昶弟也。昶顗並美風姿。時人謂之雙珠。南史

楊廷和美風姿。性沈靜。鬱然負公輔望。明史

商輅除修撰。進學東閣。丰姿瓌偉。帝親簡爲展書官。

王洽。萬歷末爲知縣。儀表頎偉。危坐堂上。吏民望之若神明。累官僉都御史。巡撫浙江。崇禎元年。召拜工部侍郎。攝尚書事。帝召見羣臣。奇洽狀貌。卽擢任之。

醜陋

叔向適鄭。驪蔑惡。欲觀叔向。從使之收器者而往。立於堂下。一言

而善。叔向聞之曰。必驪明也。下執其手。以上曰。昔賈大夫惡娶妻而美。三年不言不笑。御以如皐。射雉獲之。其妻始笑而言。賈大夫曰。才之不可以已。我不能射。女遂不言不笑。夫今子少不颺。子若無言。吾幾失子矣。遂如故。知。左傳

澹臺滅明。狀貌甚惡。事孔子。孔子以爲材薄。退而脩行。名施乎諸侯。孔子聞之曰。吾以貌取人。失之子羽。史記

周燮生而斂頤折頰。醜狀駭人。其母欲棄之。其父不聽。曰。吾聞賢聖多有異貌。興我宗者此兒也。於是養之。及長。專精禮易。舉徵皆以疾辭。後漢書

陸驗容貌特醜。先是外國獻生犀。其形甚陋。故閭里謂驗爲生犀。

南史

荀士遜爲中書舍人。貌甚醜。以文辭見重。奏事遇武成在後。廷傳通者云醜舍人。帝曰。必士遜也。看封題果是。

北史

朱泚之亂。裴佖與衣冠數人。佯爲奴。求出城。佖最寢陋。自稱甘草門兵曰。此數人定非人奴。如甘草者不疑。

世說

賈銓擢雲南左布政使。舉政績卓異。戶部初闕尚書。王勣欲擢銓。英宗問李賢。賢曰。聞其名。未見其人也。及是來覲。帝命賢視之。還奏貌寢。乃以爲右副都御史。巡撫山東。

明史

徐禎卿舉進士。孝宗遣中使問禎卿。與華亭陸深名。深遂得館選。而禎卿以貌寢不與。授大理左寺副。

楊一清。生而隱宮。貌寺人。其才一時無兩。

美婦

手如柔荑。膚如凝脂。領如蝤蛴。齒如瓠犀。螭首蛾眉。巧笑倩兮。美

目盼兮。詩經

宋玉曰。天下之佳人。莫若楚國。臣東家之子。增之一分則太長。減

之一分則太短。着粉則太白。施朱則太赤。眉如翠羽。肌如白雪。腰

如束素。齒如含貝。嫣然一笑。惑陽城。迷下蔡。登徒子好色賦

宋孔嘉父之妻美。宋華督父見之於路。目逆而送之。曰。美而艷。左傳

邾婁顏夫人有國色。公羊傳

越王選擇美女。得苧蘿山之女。西施鄭旦。教以容步。獻於吳。吳越春秋

中疑好有請不得相見

武帝時尹婕妤邢姪娥並幸有請不得相見尹夫人自請武帝願見邢夫人帝許之令他夫人飾從御者數十爲邢夫人來前尹夫人曰此非邢夫人也視其形狀不足以當人主於是帝使邢夫人衣故衣獨身來前尹夫人望見之曰此真是也乃低頭而泣自痛其不如也史記補

卓文君姣好眉色如望遠山臉際若芙蓉

西京雜記

王昭君字嬀元帝時以良家子選入掖廷呼韓邪來朝帝勅以宮女五人賜之昭君入宮數歲不得見御積悲怨乃請掖廷令求行呼韓邪臨辭大會帝召五女以示之昭君豐容靚飾光明漢宮顧影裴回竦動左右帝見大驚欲畱之而難於失信遂與匈奴後漢書

蜀先主甘后玉質容冶。先主召入綃帳中。於戶外望者。如月下聚雪。河南獻玉人高三尺。乃擁后而玩玉人。后與玉人潔白齊潤。觀者殆相亂惑。拾遺記

魏文帝美人薛靈芸。容貌絕世。帝名曰夜來。

張貴妃麗華。髮長七尺。容色端麗。每瞻視盼睐。光采溢目。照映左右。嘗閣上靚粧。臨於軒檻。宮中遙望。飄若神仙。陳書

唐明皇淑妃王氏。有美色。號花見羞。五代史

後主保儀黃氏。容態華麗。冠絕當世。顧盼顰笑。無不妍姣。其書學伎能。皆出於天性。南唐書

醜婦

黃帝第四妃曰嫫母。貌惡德充。

鍾離春者。齊無鹽邑之女。極醜無雙。行嫁不售。自謁宣王。陳四殆。

王迎以爲后。列女傳

黃承彥者。沔南名士。謂諸葛亮曰。聞君擇婦。身有醜女。黃頭黑色。而才堪相配。亮許。卽載送之。鄉里爲之諺曰。莫作孔明擇婦。正得

阿承醜女。襄陽記

許允婦阮奇醜。交禮竟。允無復入理。家人深以爲憂。會允有客至。婦令婢視之。還答曰。桓郎。婦云無憂。桓必勸入。許回入內。旣見婦。卽欲出。婦捉裾停之。許因謂曰。婦有四德。卿有其幾。婦曰。新婦所乏惟容耳。然士有百行。君有幾。許云皆備。婦曰。百行以德爲首。君

好色不好德。何謂皆備。允有慚色。遂相敬重。世說

李太后本出微賤。始簡文帝無子。令善相者召諸愛妾示之。皆云非其人。又以諸婢示焉。時后爲宮人。形長而色黑。宮人皆謂之崑崙。既至。相者驚云。此其人也。帝召之侍寢。遂生孝武。晉書

貌肖

師還齊侯。晉卻克稽首馬前。逢丑父者。頃公之車右也。面目與頃公相似。代頃公當左。使頃公取飲。頃公用是佚。還同環。公羊傳。

孔子過匡。匡人以爲魯之陽虎。虎嘗暴匡人。匡人遂止孔子。孔子狀類陽虎拘焉。史記

孔融與蔡邕素善。邕卒後。有虎賁士貌類於邕。融每酒酣。引與同

坐曰雖無老成人。且有典刑。後漢書

張伯偕與弟仲偕形貌相似。仲偕娶妻。新粧畢。忽見伯偕。戲問曰。粧好否。伯偕曰。我伯偕也。妻乃趨避之。須臾又見伯偕。猶以爲仲偕。告云。向大錯誤。伯偕曰。我故伯偕也。風俗通

桓豹奴是王混外甥。形似舅。桓甚諱之。宣武云。不恒似時似耳。恒似是形。時似是神。桓愈不悅。世說

謝弘微性嚴正。舉止必脩禮度。時有蔡湛之者。及見謝安兄弟。謂人曰。弘微貌類中郎。而性似文靖。齊書

王孝傑。高宗末。西討吐蕃。爲賊所獲。吐蕃贊普見孝傑。垂泣曰。貌類吾父。厚加敬禮。唐書

長

吳伐越。墮會稽。得骨節。專車。使使問仲尼。仲尼曰。禹致羣神於會稽山。防風氏後至。禹殺之。其節專車。吳客曰。人長幾何。仲尼曰。僬氏三尺。短之至也。長者不過十之數之極也。史記

叔孫得臣敗狄於鹹。長狄也。兄弟三人。大害中國。瓦石不能害。叔孫得臣。最善射者也。射其目。身橫九畝。斷其首。眉見於軾。穀梁傳

秦襄王時。宕渠郡獻長人。長二十五丈六尺。

蜀王本紀

王莽招猛士。時有長人。巨無霸。長一丈。大十圍。莽以爲壘尉。

後漢書

苻堅拂蓋郎夏默等三人。長至一丈九尺。每食飯一石。肉三十斤。

羣碎錄

房法乘身長八尺三寸行出人上常自俯屈南齊書

秘書丞任中正軀幹頗長太宗擇大笏取緋衣之長者賜之宋史

王驥長身偉幹便騎射剛毅有膽曉暢戎畧明史

短

晏子長不滿六尺身相齊國名顯諸侯史記

孟嘗君之趙趙人出觀之笑曰始以薛公爲魁然也今視之眇小

丈夫耳

黎陽令馮偃長不滿七尺自恥短陋恐子孫之似也乃爲子伉娶

長妻伉生勤長八尺三寸後漢書

王珣爲桓溫主簿爲人短小故號曰短主簿晉書

陸慧曉爲吏部郎。孝武欲用爲侍中。以形短小。乃止。南史

清河王岳拜司州牧。召孟業爲法曹。業形貌短小。岳心鄙其眇小。

後尋業斷決之處。乃曰。卿斷決之明。可謂有過軀貌之用。北齊書

李擲長不盈五尺。而跨馬陷陣。隱身鞍甲之中。敵見皆曰。避此小

兒。周文歎曰。膽決如此。何必八尺之軀。北史

李紳短小精悍。於詩最有名。時號短李。唐書

張思均官左千牛衛將軍。質狀小而精悍。太宗嘗稱其樓羅。自是

人目爲小樓羅。宋史

張元禎進學士。充經筵日講官。體清癯。長不踰中人。憲宗特設低

几聽之。明史

肥

子夏見曾子。曾子曰。何肥也。子夏曰。吾入見先王之義。則榮之。出見富貴又榮之。兩者未知勝負。故癯。今先王之義勝。故肥。闕里志

張蒼坐法當斬。解衣伏質。身長大肥。白如瓠。時王陵見而怪其美。

士乃言沛公。赦勿斬。史記

耿秉有偉體。腰帶八圍。後漢書

南陽王保。體質肥偉。嘗自稱較重八百斤。晉書

王萬有美名。少而大肥。父戎令食糠。而肥愈甚。

隋郡王子隆。年二十一。而體過充壯。常服蘆茹丸。以自銷損。南齊書

侍中袁象。形體充腴。每從車駕射雉。在郊野。數人推扶。乃能徙步。

王世積容貌魁岸。腰帶十圍。累封宜陽郡公。

隋書

韋藝爲營州總管。容貌瓌偉。每夷狄參謁。必整儀衛。盛服以見之。

獨坐滿一榻。蕃人畏懼。莫敢仰視。

唐書

盛度體豐肥。一日自殿前出。宰相在後。盛欲趨避。行百餘步。乃得

直舍。隱於其中。石學士見其喘甚。問之。盛告以故。石曰。相公問否。

盛曰。不問。別去十餘步。乃悟。罵曰。奴乃以我爲牛。

世說

吾也。而珊竹氏狀貌甚偉。腰大十圍。

元史

彭澤體幹修偉。腰帶十二圍。

明史

瘦

庾公造周伯仁。伯仁曰。君何所欣悅而忽肥。庾曰。君何所憂慘而

忽瘦伯仁曰。吾無所憂。直是清虛。日來滓穢。日去耳。世說

沈昭略嘗醉逢王約。張目視之曰。汝是王約耶。何乃肥而癡。約曰。

汝沈昭略耶。何乃瘦而狂。昭略大笑曰。瘦已勝肥。狂又勝癡。南史

唐元宗嘗臨鏡不樂。左右曰。韓休爲相。陛下殊瘦於舊。何不逐之。

上歎曰。吾貌雖瘦。天下必肥。通鑑

王洪。張亢。同在南京。晏元獻幕府。張肥大。王以太牢目之。王瘦小。

張以獼猴目之。一日有米船至八百里邨。水淺當剝載。張往督。王

曰。所謂八百里剝也。張曰。未若三千年精矣。澠水燕談

頭面

宣帝有狼顧相。魏武欲驗之。乃召使前行。令反顧。帝面正向後。而

身不動。晉書

謝石少患面瘡。療之莫愈。乃自匿。夜有物來舐其瘡。隨舐隨差。舐處甚白。故世呼爲謝白面。

祖廣仕至護軍長史。廣行常縮頭。詣桓南郡。始下車。桓曰。天甚晴明。祖叅軍如從屋漏中來者。世說

趙命善於清談。有國士之風。其面有疵點。諸事不決。皆言當問疵

面也。王隱
晉書

劉牢之面紫赤色。鬢目驚人。而沈毅多計。晉中
典書

范岫博涉多通。范雲謂人曰。諸君進止威儀。當問范長頭。梁書

侍中古弼頭尖。世祖嘗名之曰筆頭。是以時人呼爲筆公。魏書

僕射元欽色黑時人號爲黑面僕射

宗如周事蕭詧官列卿面狹長以法華經云聞經隨喜面不狹長
詧嘗戲之曰卿何爲謗經如周跣踏出告蔡大寶大寶笑曰君不
謗餘經正應不信法華耳如周乃悟

周書

桑維翰身短而面長嘗臨鑑以自奇曰七尺之身不如一尺之面
五代史

尹繼倫充北面緣邊巡檢使契丹相戒曰當避黑面大王以繼倫
面黑故也

宋史

宰相王德用面黑頸以下白皙人呼曰黑王相公

陳獻章右頰有七黑子

明史

胃腹

王導嘗枕周顗膝而指其腹曰此中何所有答曰此中空洞無物然足容卿輩數百人

晉書

郝隆七月七日出日中仰臥人問其故答曰我曬書

世說

范仲淹爲陝西招討使人曰小范老子胃中有數萬甲兵

通鑑

黨進爲太尉目不知書一日捫腹語曰吾不負汝一家妓進曰將軍固不負此腹但此腹負將軍耳

潛確類書

軒輓孤峭遇人無賢否拒不與接爲按察使嘗飲同僚家歸撫其

腹曰此中有贓物也

明史

于謙性故剛遇事有不如意輒拊膺歎曰此一腔熱血竟灑何地

朱熹元長八尺。腹大十圍。飲啖兼二十人。

耳

帝堯欲禪位於許由。許由曰。汚吾耳。往水次洗之。高士傳

禹耳參漏。是謂大通。參三也。漏穴也。淮南子

黃霸爲潁川太守。長吏許丞老病。薨。督郵白欲逐之。霸曰。許丞廉

吏。雖老。尚能拜起送迎。重聽何傷。漢書

先主顧自見其耳。蜀志

王導多疾。每自愛。陳訓曰。公耳豎。必壽。亦大貴。晉書

殷成已母顏。叔父敬仲爲酷吏所陷。顏率二妹割耳訴冤。敬仲得

減死。及成已生而左耳缺。唐書

李忠臣檢校司空德宗嘗謂卿耳大真貴兆對曰臣聞驢耳大龍耳小帝喜其野而誠

孟洪徽對宣宗曰陛下何以不知有臣何不以文字召用帝怒曰

朕耳冷不知有卿

朝野僉載

蘄州龐君常善醫而耳聾與語須書始能曉東坡笑曰吾與君常

異人也吾以手爲口君以眼爲耳

志林

目

舜目重瞳子項羽亦重瞳子

史記

王戎視目不眩裴楷見而目之曰戎眼爛爛如巖下電

晉書

阮籍能爲青白眼見禮俗之士以白眼對之及母終嵇喜來弔籍

作白眼。喜不懌而退。喜弟康聞之。齋酒挾琴造焉。籍大悅。乃見青眼。

褚淵目多白精。人謂之白虹貫日。南齊書

沈約左目重瞳子。梁書

徐陵目有青睛。時人以爲聰慧之相。陳書

王肅弟秉之初歸國。謂楊大眼曰。在南聞君之名。以爲眼如車輪。及見。乃不異於人。大眼曰。旗鼓相望。瞋眸奮發。足使君目不能視。

何必大如車輪。北史

劉炫眸子精明。視日不眩。隋書

武攸緒隱居龍門少室間。晚年瞳有紫光。晝能見星。唐書

張公素爲幽州節度使。同平章事。性暴厲。眸子多白。燕人號白眼相公。

李泌少時。賀知章見之曰。此稚子目如秋水。必拜卿相。

鄴侯家傳

孟速思幼有奇質。年十五。盡通本國書。太祖聞之。召至闕下一見。大悅曰。此兒目中有火。他日可大用。

元史

宋濂視近而明。一黍上能作數字。

明史

方孝孺幼警敏。雙眸炯炯。讀書日盈寸。鄉人目爲小韓子。

鼻

漢高祖隆準龍顏。

史記

何晏問管輅夢青蠅數十來鼻上。何故。輅曰。鼻者。艮。此天中之山。

高而不危。所以長守貴。今青蠅臭惡而集之。不可不思害盈之數。盛衰之期。

魏志

謝安本能爲洛下書生詠。有鼻疾。故其音濁。名流愛其詠而弗能及。或手掩鼻以效之。

晉書

王慧龍渡江歸國。崔浩見之曰。信王家兒也。王氏世臚鼻。江東謂之臚王。慧龍鼻大。浩曰。真貴種矣。

魏書

王廷湊微賤時。醉寢於路。有過其所者視之曰。非常人也。從者以告。廷湊馳及之。問其故。曰。吾見君鼻之息。左若龍。右若虎。子孫當王百年。及廷湊據鎮冀。傳孫鎔。凡百年。

唐書

徐筠少夢神人攜竹籃。其中皆人鼻。視徐曰。形相不薄。但鼻曲而

小吾與汝易之。剗去徐鼻。擇一鼻安之。笑曰。好一正郎鼻也。徐鼻素不正。自爾端直。後歷官正郎。拾異志

口

常樅有疾。老子曰。先生疾甚。無遺教語弟子乎。常樅乃張其口示老子曰。舌存乎。曰。存。非以其軟耶。齒亡乎。曰。亡。豈非以剛耶。常樅曰。天下事盡矣。說苑

漢王擊魏豹。問酈食其曰。魏大將誰也。曰。栢直。漢王曰。是口尚乳臭。漢書

韓非口吃。不能道說。而善著書。史記

周昌爲御史大夫。高帝欲廢太子。昌廷爭之彊。上問其說。昌爲人

吃。又盛怒曰。臣口不能言。然臣期期知其不可。陛下雖欲廢太子。臣期期不奉詔。

鄧艾口吃。語稱艾艾。晉文王戲之曰。卿云艾艾。定是幾艾。對曰。鳳

兮鳳兮。故是一鳳。世說

蔡裔有勇氣。聲若雷霆。嘗有二偷入室。裔拊牀一呼。而盜俱隕。晉書

魚俱羅聲氣雄壯。言聞數百步。隋書

裴俠生七歲。猶不能言。後於洛城。見羣鳥從西來。舉手指之而言。

遂聰慧異常。北史

楊元琰數歲不能言。相者曰。語遲者神定。必成大器。後封魏國公。

舊唐書

陳繹曾爲人雖口吃而精敏異常諸經注疏多能成誦文詞汪洋浩瀚其氣曄如也。元史

陳諤授刑科給事中遇事剛果彈劾無所避每奏事大聲如鐘成祖令餓之數日奏對如故曰是天性也每見呼爲大聲秀才。明史于謙宣德初授御史奏對音吐鴻暢帝爲傾聽扈蹕樂安高煦出降帝命謙口數其罪謙正詞斬斬聲色震厲高煦伏地戰慄稱萬死帝大悅師還賞賚與諸大臣等

脣齒

脣者齒之垣

春秋元命苞

東方朔上書曰臣朔齒若編貝。漢書

杜后少有姿色。然長猶無齒。有求婚者輒中止。及成帝納采之日。一夜齒盡生。晉書

魏詠之生而免缺。年十八。聞殷仲堪帳下有名醫。能療之。遂投仲堪。醫曰。可補之。但須百日進粥。不得笑語。詠之曰。半生不語而有半生。亦當療之。况百日耶。仲堪處之別屋。令醫善療之。詠之遂閉口不語。惟食薄粥。及差。仲堪厚資遣之。

張巡每戰大呼。嚼齒皆碎。及尹子奇視之。其齒存者不過三四。唐書

方干爲人脣缺。後遇醫補脣。年老矣。鏡湖人號曰補脣先生。唐詩記事

李繼遷生而有齒。後官至夏州刺史。宋史

李夢陽爲戶部郎中。應詔上書。極論得失。末言壽寧侯張鶴齡罔

利賊民。勢如翼虎。鶴齡奏辨。摘疏中語。誣夢陽訕母后爲張氏。罪當斬。時皇后有寵。后母金夫人泣訴孝宗。弗聽。切責鶴齡。左右請予杖。以洩金夫人憤。又弗許。他日夢陽途遇壽寧侯。詈之。擊以馬箠。墮二齒。壽寧侯不敢校也。明史

髮

昔有仍氏女生。鬢黑而甚美。光可以鑑。名曰元妻。樂正后夔取之。左傳

元鼎五年。郅支國貢馬肝石。以之拂髮。白者皆黑。武帝坐羣臣於甘泉殿。有髮白者。以石拂之。應手皆黑。洞冥記

顧悅之與簡文帝同年。而髮早白。帝問其故。對曰。松柏之姿。經霜

猶茂蒲柳常質望秋先零。晉書

徐榮祖嘗有罪繫獄旦日原之而髮皓白齊武問其故曰臣思愆於內而髮變於外。南史

范縝年二十九髮白皤然乃作傷暮詩白髮詠以自嗟。

元順以父憂哭泣時年二十五便有白髮免喪抽去不復更生人以為孝思所致。北史

唐李林甫為相有壻鄭平為戶部員外林甫見其鬚髮斑白謂平曰上明日當賜甘露羹鄭郎若食可轉黑已而果驗。明皇雜錄

蕭因吉髮長五尺時呼為長髮因吉。遼史

郭德成性通敏嗜酒嘗侍宴後苑醉匍匐脫冠謝太祖顧見德成

髮種種笑曰醉風漢髮如此非酒過耶德成仰首曰臣猶厭之盡
薙始快帝默然既醒大懼佯狂自放剃髮衣僧衣唱佛不已帝謂
寧妃曰始以汝兄戲言今實爲之真風漢也後黨事起坐死者相
屬德成竟得免

明史

胡濙生而髮白。彌月乃黑。

鬚

湯長頭而導。伊尹蓬頭而導。

晏子

張遼問吳降人曰。向有紫髯將軍是誰。降人答曰。是孫會稽也。

帝獻

春秋

任城王彰膂力過人。太祖在漢中。劉備使劉封挑戰。太祖曰。呼我

黃鬚兒令擊之。彰鬚黃。故以呼之。魏略

諸葛亮答關羽書曰。馬孟起一世之傑。猶未及髯之絕倫軼羣也。

羽美鬚髯。故亮謂之髯。蜀志

王彪之年二十。鬚鬢皓白。時人謂之王白鬚。晉書

宋武帝狎侮羣臣。各有稱目。多鬚者謂之羊。南史

許惇爲殿中尚書。美鬚髯。下垂至帶。省中號爲長鬚公。顯祖嘗酒

酣。握惇鬚髯稱美。遂以刀截之。惟留一握。惇懼。因不敢復長。時人

又號爲齊鬚公。北齊書

李光弼之母有鬚數十。長五寸許。封韓國太夫人。唐書

岳正。灤縣人。正統十三年進士及第。授編修。進左贊善。天順初改

修撰以王翺薦召見。正長身美鬚髯。帝遙見色喜。既登陞。連稱善。問年幾何。家安在。何年進士。正具以對。復大喜曰。爾年正強仕。吾北人。又吾所取士。今用爾內閣。其盡力輔朕。明史

孫承宗容貌奇偉。鬚髯戟張。與人言。聲殷牆壁。

手

唐叔虞生。有文在其手曰虞。遂以命之。左傳

成季之生也。有文在其手曰友。遂以命之。

趙婕妤家在河間。武帝過河間。望氣者言此有奇女。天子使使召之女。兩手皆拳。上自披之手。卽時伸。由是得幸。號曰拳夫人。漢書

先主垂手下膝。蜀志

王夷甫容貌整麗。恒捉白玉柄麈尾。與手都無分別。世說

陶侃歷官太尉。封長沙郡公。初侃少時。有善相者曰。君左手中指有豎理。當爲公。若徹於上。貴不可言。侃以針決之。見血。灑壁而爲

公字。以紙裹手。公字愈明。晉書

祝允明。生而枝指。故自號枝山。又號枝指生。明史

足

齊則鮑莊子。仲尼曰。莊子之智不如葵。葵猶能衛其足。左傳

衛襄公夫人姜氏無子。嬖人嫫始生孟縶。孟縶之足不良於行。

漢楚相持。項羽伏弩射中漢王。漢王傷臂。乃捫足曰。虜中吾指。史記

侍中蘇則與董昭同寮。昭嘗枕則膝臥。則推下之曰。蘇則膝非佞

人枕。魏志

習鑿齒以脚廢於里。苻堅陷襄陽。素聞其名。與釋道安俱輿而致焉。與語大悅。以其蹇疾。與諸鎮書云。昔晉氏平吳。利在二陸。今破漢南。獲士纔一人有半耳。類傳

齊始安王遙光。生而蹇疾。人有餉履者。以爲戲。已大被嫌責。南史梁陰子春。身服垢污。脚數年一洗。言每洗脚。則失財敗事。

東昏侯鑿金爲蓮花以帖地。令潘妃行其上。曰。此步步生蓮花。

真宗左足指有文成天字。宋史

梅侍讀晚年。躁於祿位。而病足。嘗撫其足而言之曰。是中有鬼。令我不至兩府者。汝也。世說

孫炎字伯融。面鐵色。跛一足。談辨風生。雅負經濟。明史

文震孟在講筵。最嚴正。莊烈帝嘗足加於膝。適講五子之歌。至爲人上者。奈何不敬。以目視帝足。帝卽袖掩之。徐爲引下。時稱真講官。

殘破

左邱失明。厥有國語。孫子臙脚。而論兵法。史記

黥布。姓英氏。秦時爲布衣。有客相之曰。當刑而王。及壯。坐法黥布。欣然笑曰。人相我當刑。而王幾是乎。及布以兵屬項梁。項王立布爲九江王。後歸漢。漢立布爲淮南王。

丁儀。沛郡人。太祖聞儀爲令士。欲以女妻之。五官將曰。女人觀貌。

而正禮目不便。不如與伏波子楸。太祖從之。尋辟儀爲掾。嘉其才。曰。丁掾好士也。卽使兩目盲。尚當與女。何況但眇。是兒誤我。魏略

劉之遴寄居南郡。忽夢前太守袁彖謂曰。卿後當爲折臂太守。卽居此中。之遴後牛奔墮車折臂。右手偏直。不復得屈伸。歎曰。豈黥而王乎。後再爲此郡。南史

李諧爲人短小。六指。因癭而舉頤。因跛而緩步。因蹇而徐言。人言

李諧善用三短。北史

章昭達少遇相者謂曰。卿貌甚善。須小虧損。當富貴。及侯景之亂。昭達援臺城。爲流矢所中。眇其一目。相者曰。卿相善矣。不久當貴。

昭達官至開府。封邵陵郡公。陳書

李克用一目眇號獨眼龍

五代史

季孫行父禿誤作禿

楊希閔生而失明。令諸弟讀經史。一歷耳輒不忘。屬文善緘尺。趙普守西洛。府中牋疏皆希閔所爲。

宋史

笑

戎常寇關。幽王擊鼓。諸侯皆至。褒姒大悅而笑。王欲褒姒之笑。數擊鼓。而諸侯至無寇。及其寇至。擊鼓而諸侯不來。遂爲戎所滅。

呂氏春秋

春秋

季孫行父克。晉卻克眇。衛孫良夫跛。曹公子首僂。同時而聘於齊。齊使禿者御禿者。使眇者御眇者。使跛者御跛者。使僂者御僂者。蕭同叔子處臺上而笑之。聞於客。客不悅而去。

左傳

淳于髡仰天大笑。冠纓索絕。史記

陸雲兄機初詣張華。華問雲何在。機曰。雲有笑疾。未敢自見。俄而雲至。華爲人多姿致。又好帛繩纏鬚。雲見而大笑。不能自已。先是嘗著線經上船。於水中顧見其影。因大笑。落水。人救獲免。晉書

元萇性剛毅。未嘗開口而笑。高祖遷都。萇以代尹留鎮。因別賜萇酒曰。聞公一生不笑。今方隔山。當爲朕笑。竟不能得。魏書

宦者魚朝恩會百官釋菜。執易升坐。講鼎有覆餗象。以侵宰相。王綰怒。元載怡然。朝恩曰。怒者常情。笑者不可測。元載銜之。唐書

包拯立朝剛毅。人以拯笑比黃河清。宋史

扈蒙歷官戶部侍郎。有笑疾。雖上前不自禁。

嚴嵩當國時。江西士紳以生辰致賀。嵩長身聳立。諸公俯躬謁。高拱旁睨而笑。嵩問其故。拱曰。偶思韓昌黎鬪雞詩。大雞昂然來。小雞竦而待。是以失笑耳。京師市語謂江西人爲雞。相與鬪堂而散。

列朝詩集小傳

哭

孔子在衛。聞哭者之聲甚哀。顏回曰。此聲非但爲死者。又有生離別者也。子曰。何以知之。對曰。回聞桓山之鳥。生四子。羽翼旣成。將分於四海。其母悲鳴而送之。哀聲有似於此。孔子使人問哭者。果曰。父死。家貧。賣子以葬。與之長決。子曰。回也善於識音矣。

孔子家語

雍門子以哭見於孟嘗君。陳辭通意。撫心發聲。孟嘗君爲之增欷。

嗚咽流涕不可止。淮南子

顧愷之拜桓溫墓。或問曰。卿憑重桓公。哭狀其可見乎。答曰。聲如

震雷破山。淚如傾河注海。晉書

慕容熙僭后苻氏死。熙悲號擗踊。若喪考妣。制百僚於宮內哭臨。使有司案驗。有淚者爲忠。無則罪之。羣臣懼。莫不含辛以爲淚。

劉德願爲世祖所狎。上寵姬殷貴妃薨。葬畢。與羣臣至殷墓。謂德

願曰。卿哭貴妃若悲。當厚賞。德願便號慟。撫膺擗踊。涕泗交流。上

悅。以爲豫州刺史。又令醫術人羊志哭殷氏。志亦嗚咽。他日有問

志。卿那得此副急淚。志時新喪愛姬。答曰。我爾時自哭亡妾耳。宋書

王元景使梁。劉孝綽送之泣下。元景無淚。謝曰。卿勿怪我。別後當

闌干耳。談藪

唐衢應進士舉。久而不第。見人文章有傷歎者。讀訖必哭涕泗。不能已。與人言論。既相別。發聲一號。音辭哀切。太原戎帥軍宴衢。預會酒酣言事。抗音而哭。一席不樂。爲之罷會。世稱唐衢善哭。舊唐書

行

道路。男子由右。婦人由左。車從中央。父之齒隨行。兄之齒雁行。朋

友不相踰。禮記

簡文作撫軍時。與桓宣武入朝。更相讓在前。宣武不得已而先之。因曰。伯也執殳。爲王前驅。簡文曰。所謂無小無大。從公于邁。世說

孫綽好譏調。嘗與習鑿齒共行。綽在前。顧謂鑿齒曰。沙之汰之。瓦

石在後鑿齒曰簌之揚之糠粃在前晉書

臥

邊韶字孝先曾晝日假寐弟子私嘲曰邊孝先腹便便懶讀書但

欲眠後漢書

何元爲成都令常眠睡其覺寤便得姦詐咸畏元之發摘或以爲

有術得知之無敢復欺者益部耆舊傳

許汜與劉元德在劉荊州坐共論人物許曰昔遭亂過下邳見陳

元龍無客主之意不相與語自上大牀臥使客臥下牀元德曰君

有國士之名今四海橫流而無救世之意言無可採元龍何緣與

君語如我自臥百尺樓上臥君於地下何但上下牀之間哉世說

許侍中顧司空嘗夜至丞相許戲丞相命入已帳眠顧至曉回轉不得快孰許上牀便哈臺大鼾丞相顧諸客曰此中亦難得眠處允良封華原郡王好酣寢以日爲夜由是一宮之人皆晝睡夕興

宋史

陳琛杜門獨學有以恬退薦者辭不赴卻掃一室偃臥其中長吏莫得見其面

明史

史可法督師揚州歲除遣文牒至夜半倦索酒庖人報殺肉已分給將士無可佐者乃取鹽豉下之可法素善飲在軍中絕飲是夕進數十觥思先帝泣然淚下凭几臥比明將士集轅門外門不啟左右遙語其故知府任民育曰相公此夕臥不易得也命鼓人仍

擊四鼓。戒左右毋驚相公。須臾可法寤。聞鼓聲大怒曰。誰犯吾令。將士述民育意。乃獲免。

夢

占夢。占六夢之吉凶。一曰正夢。二曰噩夢。三曰思夢。四曰寤夢。五曰喜夢。六曰懼夢。周禮

武丁夜感。得賢佐兮。周夢九齡。年克百兮。齊桓夢物。亦以霸兮。晉

文監腦。國以競兮。

王延壽
夢賦

周宣占夢。十中八九。

魏志

索紞善術數。惟以占夢為無悔吝。乃不逆來者。所占莫不驗。

晉書

衛玠嘗問樂廣夢。廣云。是想。玠曰。神形所不接而夢。豈想耶。廣曰。

因也。玠思之不得，遂成疾。廣命駕爲剖析之，玠病卽愈。或問殷浩曰：「將莅官而夢棺，將得財而夢糞，何也？」浩曰：「官本臭腐，故將得官而夢尸；錢本糞土，故將得錢而夢穢。時以爲名言。」

好潔

庾炳之性好潔，士大夫造之者，去未出戶，輒令人拭席洗牀。宋書

王思遠立身簡潔，衣服牀筵窮治素淨。賓客來通，輒使人先密覘視衣服垢穢，席便不前。形儀新楚，乃與促膝。雖然，旣去之後，猶令二人交帚拂其坐處。南齊書

何佟之性好潔，一日之中，洗滌者十餘過，猶恨不足。時人稱爲水淫。南史

趙匡凝每整衣冠使人持巨鑑前後照微覺有塵卽令持紅拂去之。世說

倪瓚有潔癖盥濯不離手俗客造廬比去必洗滌其處。明史

破瓢道人吳孺子所居焚香掃地名僧韻士樂爲談對客去閉門藉虎皮危坐移日人問之曰我尋味好客話言折除對俗夫時耳好潔不畏寒遇泉水清冷雖盛冬便解衣赴濯。列朝詩集小傳

穀玉類編卷三十五

休寧 汪兆舒果齋輯

方外類

佛教

僧

道教

前生

神鬼

佛教

佛者覺也。覺一切種智。復能開覺有情。如睡夢覺。故名爲佛。佛地論

明帝夢金人長丈餘。頭有光明。以問羣臣。或曰。西方有神名曰佛。其形丈六尺而黃金色。帝於是遣使天竺。問佛道法。遂於國中圖

畫形像焉。後漢書

文殊師利問維摩詰。何者是菩薩入不二法門。維摩詰默然無言。
文殊歎曰。善哉。乃至無有文字語言。是真入不二法門也。維摩經

水行中龍力大。陸行中象力大。故以負荷大法者。比之龍象。智度論

釋迦以燈喻法。謂能破暗也。六祖相傳法。故云傳燈。潛確類書

須達多長者。欲營精舍。請佛住。惟祇陀太子園。太子戲曰。滿以金

布。當相與。長者出金布八十頃。精舍告成。曰。祇樹給孤獨園。經律異相

有僧問大梅和尚。見馬祖得个甚麼。大梅曰。馬祖道即心是佛。僧

曰。馬祖近日又道非心非佛。大梅曰。任汝非心非佛。我只管即心

是佛。馬祖曰。梅子熟矣。傳燈錄

王坦之與沙門竺法師甚厚。每共論幽明報應。便要先死者當報

其事後經年師忽來云。貧道已死。罪福皆不虛。惟當勤修道德。以升濟神明耳。言訖不見。晉書

到溉與弟洽共居一齋。洽卒後。便捨爲寺。蔣山有延賢寺。溉家世所立。溉得祿俸。皆充二寺。因斷腥羶。別營小室。朝夕從僧徒禮誦。及卒。顏色如恒。手屈二指。卽佛道所云得果也。南史

司徒崔光崇信佛法。禮拜讀誦。老而逾甚。每爲沙門朝貴。請講維摩十地經。聽者常數百人。魏書

孫敬德負罪當死。夢沙門教誦救苦觀世音經。覺後如所夢誦。千遍。臨刑刀折。主者以聞。丞相高歡表請免死。勅寫其經。廣布於世。今謂高王觀世音經。北史

謝蒲離不謝人事。居抹古山。屏遠輦茹。潛心佛理。延有道者。談論
彌日。人問所得何如。但曰。有深樂。惟覺六鑿不相攘。餘無知者。史

僧

十六開士。悟圓通。楞嚴經

瓶沙王呼佛弟子爲上人。德智勝行在人之上。故名。善覺要覽

天竺國無着。出世闡教。其弟天親。所造乘論五百部。後因無着開

悟。復造大乘論五百部。世稱千部論師。通塞志

杯渡者。不知其名。常乘木杯渡水。因名杯渡師。高僧傳

鳩摩羅什。天竺人。專以大乘爲化。學者共師焉。姚興迎羅什。待以
國師之禮。使入西明閣。及逍遙園。譯出衆經。沙門慧叡。才識高明。

常隨羅什傳寫。羅什每爲慧叡論西方辭體。商畧同異。晉書

三乘佛家滯義。支道林分判。使三乘炳然。世說

遠公在廬山中。雖老講論不輟。弟子中或有惰者。遠公曰。桑榆之光。理無遠照。但願朝陽之暉。與時並明耳。執經登坐。諷誦朗暢。詞色甚苦。高足之徒。皆肅然增敬。

宋文帝嘗問慧觀。頓悟之義。誰復習之。答云。有生公弟子道猷。卽敕臨川郡發遣到京。旣至。大集義僧。命猷伸述。頓悟猷旣積思參元。又宗源有本。乘機挫銳。往必摧鋒。帝撫几稱快。因語諸人曰。生公孤情絕照。猷公直轡獨上。可謂克明師匠。無忝徽音。

釋慧亮過江。止何園寺。顏延之。張緒。眷德畱連。每歎曰。安汰吐珠。

玉於前。斌亮振金聲於後。清言妙緒。將絕復興。安汰道安竺法汰也斌曇斌

周彥倫目慧隆道人曰。隆公蕭散森疎。若霜下之松竹。

舒州潛山最奇。而山麓尤勝。寶誌公與白鶴道人欲之。請於梁武

帝。帝以二人悉具靈通。俾各以物識其地。得者居之。鶴先飛去。至

麓將止。忽聞空中飛錫聲。錫遂卓於山麓。各以所識築室焉。圖經

天竺菩提達摩。以梁武帝普通元年。汎海至金陵。與帝語。知機不

契。遂去。梁折蘆渡江。止嵩山少林寺。終日面壁而坐。九年。形入石

中。拭之益顯。神僧傳

融覺寺有比丘曇謨。善於義學。講涅槃華嚴。僧徒千人。天竺國沙門菩提流支。見而禮之。號爲菩薩。每誦其經論。彈指贊歎。爲胡書

寫之傳於西域。西域沙門東向禮之。號東方聖人。伽藍記

三藏法師元奘。姓陳氏。貞觀初。肇自咸京。誓往西國。窮覽聖迹。經六載。至摩伽陀城。凡十二年。備歷聖君龍庭之文。鷲嶺之秘。皆研機觀奧矣。又造迦葉結集之墟。千聖道成之樹。虔心頂禮。焚香散花。設大施會。於是五天億衆。十八國王。獻氎投珠。積如山岳。咸稱法師爲大乘也。高僧傳

浮屠智光。仁宗初。賜號廣善大國師。給以金印。智光奉命。屢使烏斯藏。遂通番國諸經。多所譯解。歷事六朝。寵錫冠羣。僧與劉淵然輩。淡泊自甘。不失戒行。明史

道教

道家之原出於老子。其爲教也。蠲去邪累。澡雪心神。積行樹功。累德增善。乃至白日昇天。長生世上。

魏書釋老志

老子爲周柱下史。周德衰。乃乘青牛車去。關令尹喜望氣。知有真人當過。果得老子。老子爲著書授之。

列仙傳

王子喬者。周靈王太子晉也。好吹笙作鳳鳴。道士浮邱公接以上嵩高山。三十餘年。後來山上。告桓良曰。告我家。七月七日。待我緱氏山頭。至期。果乘白鶴駐山巔。舉手謝時人而去。

葛洪。丹陽句容人。好神仙導養之法。從祖元吳時。學道得仙。號葛仙公。以其煉丹秘術。授弟子鄭隱。洪就隱學得其法。後至廣州。止羅浮山。煉丹。著內外篇。自號抱朴子。因以名書。及卒。尸解得仙。

晉書

許邁丹陽句容人少恬靜嘗造郭璞筮璞曰君元吉自天宜學升遐之道時南海太守鮑靚隱迹潛遁邁乃往候之探其至要初採藥於桐廬之桓山餌朮嘗服氣一氣千餘息移入臨安西山登巖茹芝眇爾自得改名元王羲之與爲世外之交元遺羲之書云自山陰南至臨安多有金馬玉室仙人芝草左元放之徒漢末諸得道皆在焉元後莫測所終好道者皆謂之羽化

吳猛豫章人有孝行邑人丁義授以神方因還豫章江波甚急猛不假舟楫以羽扇畫水而渡

陶弘景丹陽人有養生之志立句容之句曲山曰此山下是第八洞宮名金陵華陽之天昔漢有三茅君得道來掌此山故謂之茅

山乃山中立館。自號華陽陶隱居。從東陽孫游岳受符圖經法。合飛丹。色如霜雪。服之體輕。善辟穀導引之法。年逾八十而有壯容。
南史

寇謙之。好仙道。守志嵩嶽。精專不懈。以神瑞二年十月。忽遇大神。乘雲駕龍止山頂。稱太上老君。授謙之天師之位。賜雲中音誦新科之誡二十卷。使人授謙之服氣導引口訣之法。遂得辟穀。氣盛體輕。顏色姝麗。世祖聞之。使謁者迎致。於是崇奉天師。道業大行。
魏書

王遠知。事陶弘景。傳其術。隋煬帝召見臨朔宮。咨質仙事。詔京師作玉清元壇以處之。高祖尚微。遠知密語天命。貞觀九年卒。或言

壽百二十六歲。唐書

潘師正事王遠知爲道士。得其術。居逍遙谷。高宗幸東都。召見。問所須。對曰。茂松清泉。臣所須也。旣不乏矣。帝尊異之。敕直逍遙谷作門。曰仙遊。北曰尋真。

張果隱中條山。世傳數百歲人。武后時遣使召之。卽死。後人復見果居恒州山中。元宗遣人邀禮。乃至。親問治道神仙事。果善息氣。能累日不食。懇辭還山。詔號通元先生。未幾卒。或言尸解。

關西逸人呂洞賓。有劍術。百餘歲而童顏。步履輕捷。頃刻數百里。世以爲神仙。宋史

甄棲真爲道士。年七十五。遇人語之曰。汝風神秀異。雖老尚可仙。

也。因授煉形養元之訣。棲真行之二三年。漸反童顏。攀高躡危。輕若飛舉。及卒。歲久。形如生。衆始驚傳。以爲尸解。

張三丰。遼東人。一名君寶。三丰其號也。以其不飾邊幅。又號張邈邈。頤而偉。龜形鶴背。大耳圓目。鬚髯如戟。寒暑惟一衲一簑。所啖升斗輒盡。或數日一食。或數月不食。游處無恒。或云能一日千里。嘗居寶雞之金臺觀。一日自言當死。畱頌而逝。縣人共棺斂之。及葬。聞棺內有聲。啟視則復活。乃遊四川。歷襄漢。踪跡益奇幻。成祖遣官往訪。積數年不遇。或言三丰金時人。元初與劉秉忠同師。後學道於鹿邑之太清宮。然皆不可考。天順三年。賜誥贈爲通微顯化真人。終莫測其存亡也。

明史

劉淵然。幼爲祥符宮道士。頗能呼召風雷。太祖聞其名。賜號高道。永樂中。從至北京。仁宗立。賜號長春真人。宣德初。進大真人。卒年八十二。閱七日入殮。端坐如生。淵然有道術。爲人清靜自守。故爲累朝所禮。

前生

張衡初死。蔡邕母始懷孕。二人才貌甚相類。時人云。蔡邕是衡之後身。語林

羊祜五歲時。令乳母取所弄金環。乳母曰。汝先無此物。祜卽詣鄰人李氏。東垣桑樹中探得之。主人驚曰。此吾亡兒所失物也。云何持去。乳母具言之。李氏悲惋。時人異之。謂李氏子。則祜之前身。晉書

鮑靚東海人年五歲語父母云本是曲陽李家兒九歲墜井死其父母尋訪得李氏推問皆符驗靚後官南海太守百餘歲卒

處州釋知威天與多能富有詞藻時傳是徐陵後身高僧傳

尚書郎李庶妻元羅女也庶亡元氏更適趙起嘗夢庶謂已曰我薄福託劉氏爲女明旦當出彼家甚貧恐不能見養夫妻舊恩君宜乞取我劉家在七帝坊十字街南東入窮巷是也元氏不應庶曰君似懼趙公意我自說之於是起亦夢焉起寤問妻言之符合遂持錢帛往劉氏如所夢得之養其女長而嫁焉

北史

房瑄爲盧氏宰道士邢和璞來瑄敬禮之暇日同出城因至夏谷村一廢寺松竹森映和璞坐於下以杖叩地便一人掘之數尺得

一瓶瓶中皆婁師德與永公書笑謂瑄曰頗憶此耶瑄因灑然悟
爲永公後身也。明皇雜錄

劍南節度使韋臯既生一月召羣僧會食有一胡僧貌甚陋既食
韋氏命乳母出嬰兒請羣僧祝其壽胡僧忽謂嬰兒曰別久無恙
乎嬰兒若有喜色衆皆異之胡僧曰此乃諸葛武侯之後身耳韋
氏因以武侯字之韋後自金吾節制劍南軍在蜀十八年果契胡
僧之語。宣室志

江南邊鎬初生父夢前永嘉守謝靈運來謁願託君爲父子鎬生
貌類夢中所見者小字康樂及冠穎秀嗣主累用之平建州克湘
潭時號爲邊羅漢。玉壺清話

後唐李源與僧圓澤友善。相約遊蜀中。舟次南浦。見婦人負瓮而汲。圓澤曰。此吾托身之所也。源驚問之。曰。婦人姓王。吾當爲之子。三日浴兒時。公臨視。我以笑爲信。後十三年中秋夜。當與公相見於杭州天竺寺。至暮。澤亡而婦乳。三日往視之。兒見源果笑。源遂不入蜀。後十三年。適杭州。赴其約。聞葛洪川畔有牧童歌竹枝。隔水呼源覘之。乃圓澤也。歌曰。三生石上舊精魂。賞月臨風不要論。慚愧情人遠相訪。此身雖異性常存。遂拂袖入烟霞而去。

西湖志

王氏婦梁臨川人。元兵至。與夫約曰。吾遇兵必死。若後娶。當告我頃之。夫婦被掠。有軍千戶使從已。婦給曰。歸夫而後可。千戶與金帛歸。卽之。婦拒且罵。被殺。有同掠脫歸者。道其事。越數年。夫謀更

娶。因告其故。妻夜夢。妻曰。我死後生某氏家。今十歲矣。後七年當復爲君婦。明日遣人聘之。一言而合。詢其生與婦死年月同云。宋史
夏子孝。九歲。父得危疾。禱天地。刲股調羹以進。父食之頓愈。翼日子孝痛創。父詰其故。始知之。里老以聞於官。知府胡麟先夢王祥來謁。詰旦而縣牒至。詫曰。孺子其祥後身耶。召見。易其舊名恩曰。

子孝。明史

韓文。宋宰相琦後也。生時。父夢紫衣人。抱送文彥博至其家。故名之曰文。

神鬼

鄭人相驚以伯有。曰。伯有至矣。則皆走。或夢伯有介而行。曰。壬子。

余將殺帶也。明年壬寅，余將殺段。及壬子，駟帶卒。齊燕平之月壬寅，公孫段卒。國人懼，子產立公孫洩及良止以撫之，乃止。子太叔問其故。子產曰：「鬼有所歸，乃不爲厲。吾爲之歸也。」

洩駟帶子良止伯有子。左傳

智伯率韓魏攻趙，趙襄子懼，乃奔保晉陽。原過從，後至於王澤，見三人自帶以上可見，自帶以下不可見。與原過竹二節莫通曰：爲我以是遺趙母。邲原過旣至，以告襄子。襄子齋三日，親自剖竹。有朱書曰：「趙毋邲，余霍太山山陽侯天使也。」三月丙戌，余將使汝反滅智氏。汝亦立我百邑。余將賜汝林胡之地。襄子再拜，受三神之令。以三月丙戌反滅智氏。

史記

陰子方至孝，有仁恩。臘日晨炊而竈神形見。子方再拜受慶。家有

黃羊。因以祀之。自後暴至巨富。至孫識遂繁昌。故後常以臘日祀。
竈薦黃羊焉。後漢書

公沙穆居建成山中。時暴風震雷有聲於外。呼穆者三。穆不與語。
有頃呼者自牖而入。音狀甚怪。穆誦經自若。終亦無他妖異。

魏舒嘗詣野王。主人妻夜產。俄聞車馬之聲。相問曰。男也。女也。曰。

男。書之。十五以兵死。問寢者爲誰。曰。魏公。舒後十五載。詣主人問。

所生兒。曰。因條桑爲斧。傷而死。舒自知當爲公矣。後官至司徒。晉書

陸雲嘗行宿故人家。夜暗迷路。忽望草中有火光。至一家寄宿。見。

一年少。美風姿。共談老子。辭致深遠。向曉辭去。至故人家。云。此數。

十里中無人居。却尋昨宿處。乃王弼冢。雲本無元學。自此談老殊。

進。

阮瞻素執無鬼論。自謂此理可以辨正。幽明忽有一客詣瞻。談及鬼神之事。反覆甚苦。客遂屈。乃作色曰。鬼神古今聖賢所共傳。君何得獨言無。卽僕便是鬼。於是變爲異形。須臾消滅。瞻默然。意色大惡。

蕭猷封臨汝侯。爲吳興郡守。性倜儻。與楚王廟神交飲。至一斛。每酬祀。盡飲極醉。神亦有酒色。祈禱必從。後爲益州刺史。時江夏人濟苟兒反。猷乃遙禱請救。是日有一田老。逢一騎從東方來。問去城幾里。曰。百四十。俄有數百騎如風。一騎過。請飲。田老問爲誰。曰。吳興楚王。來救臨汝。當此時。廟中請祈無驗。十餘日。乃見侍衛士。

偶皆泥溼如汗者是日猷大破苻兒。梁書

慕容儼以開府鎮郢城。梁侯瑱任約率水陸軍奄至城下。於上流鸚鵡洲造荻蒺數里以塞船路。衆懼儼欲以安之。城中先有神祠俗號城隍神。儼順士卒心祈請須臾衝風驚波漂斷荻蒺約復以鐵鎖連緝防禦彌切。儼還共祈請風浪夜驚蒺復斷絕。城人大喜以爲神助。儼出城奮擊大破之。北史

張祥爲并州司馬。漢王諒反遣其將劉建攻之。復縱火燒其郭下。祥見百姓驚駭。其城側有西王母廟。登城望之再拜曰。百姓何罪致此焚燒。神其有靈。可降雨相救。言訖廟上雲起。須臾驟雨降。其火遂滅。隋書

韋太后至自金居慈寧宮。初高宗出使。有小妾言見四金甲人。執刀劍以衛。太后曰。我祠四聖。謹甚。必其陰助。旣北遷。常設祭。及歸立祠西湖上。宋史

周新爲浙江按察使。紀綱誣奏新罪。成祖怒。命逮新至戮之。臨刑大呼曰。生爲直臣。死當作直鬼。他日帝悔。問侍臣曰。周新何許人。對曰。南海帝歎曰。嶺外乃有此人。枉殺之矣。後帝若見人緋衣立。日中曰。臣周新已爲神。爲陛下治奸貪吏云。明史

湯胤績。東甌襄武王曾孫也。少爲諸生。有文武才。以薦歷官。叅將守禦。延綏孤山堡。邀寇於境上。衆寡不敵。力戰死之。未幾。邊人見一大將。盛服鼓吹。擁衆宿郵舍。質明寂無人聲。題詩壁間。有血汚

游魂歸不得。幽冥空築望鄉臺之句。見者知爲公讓手跡也。列朝詩集

小傳

穀玉類編卷三十五

穀玉類編卷三十六

休寧 汪兆舒果齋輯

器用類

璽

舟

杖

燈

簾

席

印

旗

盥盤

燭

牀

褥

笏

傘

杯

香

帳

鼎

鏡

箸

案几

枕

車

扇

爐

屏風

被

璽

秦璽者李斯之魚虫篆其圍四寸。至漢謂之傳國璽。迄於獻帝所
寶用者秦璽。若永嘉之亂沒於劉石。永和之世復歸江左者晉璽。

也。劉裕北伐，得之關中。歷晉暨陳，復爲隋有者，姚秦璽也。開運之亂，沒於耶律，女真獲之，以爲大寶者，石晉璽也。蓋在當時，皆誤以爲秦璽。而秦璽之亡，則已久矣。

宋鄭文寶璽記本末

唐有天下，作八寶。一曰神寶，所以承百王，鎮萬國。二曰受命寶，所以修封禪，禮神祇。三曰皇帝行寶，答疏於王公，則用。四曰皇帝之寶，勞來勲賢，則用。五曰皇帝信寶，徵召臣下，則用。六曰天子行寶，答四夷書，則用。七曰天子之寶，慰撫蠻夷，則用。八曰天子信寶，發番國兵，則用。

舊唐書

唐寶有八。五代亂離，多亡失。周始造二寶。一曰皇帝承天受命之寶。一曰皇帝神寶。太祖受禪，傳此二寶。又製大宋受命之寶。至太

宗又製承天受命之寶。是後諸帝嗣服。皆自爲一寶。以皇帝恭膺
天命之寶爲文。徽宗得玉工琢天子皇帝六璽。合鎮國受命二寶。
是爲八寶。政和七年。又製一寶。曰定命寶。其後京城之難。諸寶俱
失。惟大宋受命之寶與定命寶存。建炎初。作金寶三。紹興十六年。
又作八寶。一曰護國神寶。以承天福延萬億永無極爲文。二曰受
命寶。以受命于天。旣壽永昌爲文。三曰天子之寶。四曰天子信寶。
五曰天子行寶。六曰皇帝之寶。七曰皇帝信寶。八曰皇帝行寶。宋史
明初寶璽十七。其大者曰皇帝奉天之寶。曰皇帝之寶。曰皇帝行
寶。曰皇帝信寶。曰天子之寶。曰天子行寶。曰天子信寶。曰制誥之
寶。曰敕命之寶。曰廣運之寶。曰皇帝尊親之寶。曰皇帝親親之寶。

曰敬天勤民之寶。又有御前之寶。表章經史之寶。及欽文之璽。丹符出驗四方。洪武元年。欲製寶璽。有賈胡浮海獻美玉。曰此出于闐。祖父相傳。當爲帝王寶璽。乃命製爲寶。不知十七寶中。此玉製何寶也。成祖又製皇帝親親之寶。皇帝奉天之寶。誥命之寶。敕命之寶。明史

溥瀚爲禮部尙書。弘治中。陝西巡撫熊翀以鄠縣民所得玉璽來獻。以爲秦璽復出也。瀚言。秦璽完毀。具載簡冊。今所進璽。形色篆紐皆不類。蓋後人倣爲之。且帝王受命在德。不在璽。太祖製六璽。列聖相承。百三十餘載。天休滋至。受命之符。不在秦璽明矣。請姑藏內府。帝是其言。薄賞得璽者。

印

朱買臣免待詔。常從會稽守邸者寄居飯食。買臣拜太守。衣故衣。懷其印綬。步歸郡邸。會稽吏方羣飲。不視買臣。買臣少見其綬。視其印。會稽太守章也。坐中驚駭。白守丞。排列中庭拜謁。漢書

張顥爲梁相。天新雨後。有鳥飛翔墮地。卽爲圓石。顥椎破之。得一

金印。文曰忠孝侯印。博物志

許允善相印。相印法本出陳長文。長文以語韋仲將。印工楊利從

仲將受法。以語允。利以法占吉凶。十中八九。魏氏春秋

高宗河平三年。河內人於故佛圖處獲玉印。以獻。印方二寸。文曰

富樂日昌。永保無疆。福祿日臻。長享百年。玉色光潤。模制精巧。魏書

裴度爲相。中書失印。自如。俄左右白於故處得之。度不應。或問其故。曰。此必吏人盜之。以印書券耳。急則投水火。緩則復故處。時服其識量。唐書

竇妙善爲餘姚姜榮妾。正德中。榮以瑞州判攝府事。華林賊寇瑞。榮出走。賊入城。執其妻及婢數人。問榮所在。時妙善居別室。急取府印。開後窗。投荷池。衣鮮衣前曰。太守方統兵出東門捕爾等。安得執吾婢。賊意其夫人也。解前所執數人。獨與妙善出城。適所驅隸中有盛豹者。父子被掠。其子叩頭乞縱父。賊許之。妙善曰。是有力。當以昇我。何得遽縱。賊從之。行數里。妙善視前後無賊。低語豹曰。我所以留汝者。以太守不知印。欲藉汝告之。今當令汝歸。幸語

太守自此前行遇井卽逼命矣。呼賊曰：「是不善昇，可仍縱之。」易善昇者，賊又從之。行至花塢，遇井，妙善曰：「吾渴甚，可汲水置井旁。」吾將飲，賊如其言。妙善至井傍，跳身以入。賊驚，救不得而去。豹入城告，榮取印引至花塢，覓井，果得妙善屍。明史

笏

古者貴賤皆執笏。有事則搢於腰帶，所謂搢紳之士者，搢笏而垂紳帶也。手板卽古笏矣。晉書

晉宋以來，謂之手板。此不經。今還謂之笏，自西魏以降，五品已上通用象牙，六品以下兼用竹木。隋書

庾道愍精相板。宋明帝時，山陽王休祐屢以言語忤顏，見道愍以

已板令占之道慙曰此甚貴然使人多愆忤休祐以褚彥回詳密求換其板他日彥回侍帝自稱下官帝多忌甚不悅休祐具以狀言帝乃意解

張九齡爲相故事公卿皆搢笏於帶而後乘馬九齡獨使人持之因設笏囊自九齡始

唐書

王播善口奏雖數十事未嘗書於笏

唐書

任中正爲秘書丞軀幹頗長太宗擇大笏賜之

宋書

楊偉爲兵部員外郎常秉小笏以朝知制誥缺中書以偉名進仁宗曰此非秉小笏者耶

鼎

黃帝采首山之銅鑄三鼎以象三才。漢書郊祀志

昔夏之方有德也。貢金九牧鑄鼎象物。百物而爲之備。使民知神

姦。左傳

太公於渭水得玉璜。鑄一鼎。刻其文曰璜鼎。鼎錄

漢武帝元狩六年得寶鼎於汾水上。乃改元爲元鼎。通鑑

明帝永平六年王維山出寶鼎。廬江太守獻之。詔曰祥瑞之降以

應有德。易曰鼎象三公。豈公卿奉職得其理耶。太常其以祔祭之

日陳鼎於廟以備器用。賜三公帛五十匹。九卿二千石半之。後漢書

竇憲出征匈奴。南單于遺憲古鼎。容五斗。其旁銘曰仲山甫鼎。其

萬年子子孫孫永保用。憲上之。

晉成帝咸康八年。穀成縣民留珪。夜見門內有光。取得玉鼎一枚。

外圍四寸。豫州刺史以獻。著作郎曹毗上玉鼎頌。晉春秋

劉敞嘗得先秦彝鼎數十。銘識奇奧。皆案而讀之。因以考知三代制度。尤珍惜之。每曰。我死。子孫以此烝嘗我。宋史

黃孔昭爲南京工部。得古鼎。急命工鐫文廟二字。送之廟中。俄中貴欲獻諸朝。見鐫字乃止。明史

車

鸞車。有虞氏之路也。鉤車。夏后氏之路也。大路。殷路也。乘路。周路也。禮記

秦以輦爲人君之乘。漢因以雕玉爲之。通典

車千秋本姓田氏。以年老。武帝優之。朝見得乘小車。入宮殿中。故因號曰車丞相。漢書

漢成帝造飛行殿。如今之輦。選羽林士負之以趨。帝覺其行快疾。名曰雲雷宮。拾遺記

袁忠爲沛相。乘輦車到官。以清亮稱。後漢書

費禕少與董允齊名。時許靖喪子。允與禕欲會其葬。允白父和請車。和遣開後鹿車給之。允有難載之色。禕便從前先上。及至喪所。諸貴人車乘甚鮮。允猶神色未泰。而禕晏然自若。蜀志

和嶠爲尚書令。舊監令共車入朝。時荀勗爲監。嶠鄙勗爲人。每同乘高抗專車而坐。乃使監令異車。自嶠始也。晉書

阮裕有好車。借者無不皆給。有人葬母。意欲借而不敢言。裕聞之。乃歎曰。吾有車而使人不敢借。何以車爲。遂焚之。

沈慶之每朝賀。常乘猪鼻無幘車。左右者不過三五人。騎馬履行園田。每農桑劇月。從行無人。遇之者不知三公也。及廢帝賜三望車。謂人曰。我每遊履田園。有人時與馬成三。無人則與馬成二。今乘此車。安所用之乎。宋書

古者輦以人輓之。周禮巾車。后五輅。其一輦車。組輓然。縣師有車輦之稽。黍苗詩云。我任我輦。則臣民所乘亦名輦。至秦始皇去其輪而制乃尊。明諸輦有輪者。駕以馬。以別於步輦焉。輦者。肩行之車。宋中興以後。皇后嘗乘龍肩輿。又以征伐。道路險阻。詔百官乘

轎名曰竹轎子亦曰竹輿。元皇帝用象轎。駕以二象。至用紅板轎。則自明始。明史

陳遇天資沉粹。篤學博覽。太祖渡江。聘之至。與語大悅。遂留叅密議。三授翰林學士。皆辭。乃賜肩輿一乘。衛士十人。護出入以示榮寵。

羅復仁遷國子助教。以老。特賜乘小車出入。

秦紘總制三邊軍務。以意作戰車。名全勝車。詔頒其式於諸邊。

舟

古者觀落葉。因以爲舟。白帖

天子乘鳥舟龍浮於大沼。龍下有舟字。舟以龍鳥爲形。今吳之青雀舫其遺制也。穆天子傳

吳楚戰于長岸。敗吳師。獲其乘舟。餘皇。吳公子光請於其衆曰。喪先王之乘舟。豈惟光之罪。請藉取之以救死。衆許之。使長鬣者三人。潛伏於舟側。曰。我呼餘皇。則對。師夜從之。三呼皆迭對。楚師亂。吳人敗之。取餘皇以歸。左傳

吳王夫差。天池中造青龍舟。舟中盛陳妓樂。與西施爲水嬉。述異記

太液池中有鳴鶴舟。容與舟。清曠舟。采菱舟。越女舟。

洞冥記

虬泉池在五柞宮北。中有追雲舟。起風舟。侍仙舟。含烟舟。或以沙棠爲柁檝。或以木蘭文柘爲櫓棹。

漢成帝常與趙飛燕游太液池。以沙棠木爲舟。其木出崑崙山。詩曰。安得沙棠木。剡以爲舟船。述異記

孫權時名舸爲赤馬。言如馬之走陸也。又以舟名馳馬。

古今注

江夏王義恭領南兗州還朝。太祖以御所乘蒼鷹船上迎之。

宋書

祖沖之有機思。造千里船於新亭江。試之日行百餘里。

南齊書

羊侃爲衡州刺史。初赴衡州。於兩艫艫起三間通梁。水齋飾以珠

玉。加之錦繡。盛設帷屏。列女樂。乘潮解纜。臨波置酒。

煬帝造龍舟鳳舸。黃龍赤艦。樓船筏舫。募諸水工。謂之殿脚衣錦

行。勝。執青絲纜。挽船。以幸江都。帝御龍舟。文武官五品以下。給樓

船。九品以下。給黃篋船。舳艫相接二百餘里。

隋書

太宗幸金明池。命爲競渡之戲。擲銀瓶於波間。令人泅波取之。真

宗幸金明池。觀水戲。揚旗鳴鼓。分左右翼。植木繫絲。以爲標幟。方

舟疾進。先至者賜之。

宋史

金主亮至瓜州。虞允文臨江按試。命戰士踏車船中流上下。三周金山。回轉如飛。敵持滿以待。相顧駭愕。亮笑曰。紙船耳。

太祖與友諒大戰鄱陽湖。一日數十接。太祖坐胡牀督戰。劉基侍側。忽躍起大呼。趨太祖更舟。太祖倉卒徙別舸。坐未定。飛礮擊舊所御舟。立碎。友諒乘高見之。大喜。而太祖舟更進。漢軍皆失色。明史高明拜南京右僉都御史。揚州鹽寇起。詔明討之。造巨艦。名曰籌亭。往來江上督戰。並江置邏堡候望。賊踪跡無所匿。遂平之。

旗

有虞氏之旂。夏后氏之綏。殷之大白。周之大赤。

禮記

春官司常掌九旗之物名各有屬以待國事。日月爲常。交龍爲旂。通帛爲旛。雜帛爲物。熊虎爲旗。鳥隼爲旟。龜蛇爲旐。全羽爲旞。析

羽爲旟。周禮

公會鄭伯伐許。穎考叔取鄭伯之旗螯弧以先登。左傳

公使王黑以靈姑鉦率靈姑鉦旗名

李斯曰。陛下建翠鳳之旗。史記

凡旗太常畫三辰。旂畫青龍。旟畫朱雀。旐畫黃麟。旗畫白虎。旐畫

元武。皆加雲。隋書

太祖初克婺州。於城樓立大旗二面。親書對聯云。山河奄有中華

地。日月重開一統天。明興雜記

皂旗張逸其名。或曰張能力挽千斤。每戰輒麾皂旗先驅。軍中呼皂旗張。與燕兵戰。死時猶執旗不仆。明史

宣宗自將巡邊。次石門驛。兀良哈寇會州。帝帥精卒三千人往擊之。親射其前鋒。殪三人。兩翼軍並發。大破之。寇望見黃龍旗。下馬羅拜。皆生縛之。斬渠酋。

蓋繖附

張帛避雨。謂之繖蓋。通俗文

華蓋。黃帝所作。帝與蚩尤戰涿鹿之野。常有五色雲氣。金枝玉葉。止於帝上。故作華蓋。曲蓋。太公所作。武王伐紂。大風折蓋。太公因折蓋之形而制曲蓋。古今注

昭華覆之威威。甘泉賦

黃霸爲揚州刺史。帝詔賜車蓋。特高一尺。以彰有德。漢書

上官桀爲羽林期門郎。從武帝上甘泉。天大風。車不得行。解蓋授桀。桀奉蓋。雖風常屬車。雨下蓋輒御。上奇其材力。

陰興守期門僕射。從光武出入。常操持小蓋。障翳風雨。躬履塗泥。率先期門。後漢書

梁彥光爲岐州刺史。隋文嘉其能。賜御傘一枚。北史

譙國夫人洗氏。乘介馬。張錦傘。自衛。詔使循撫諸州。

徐知誥秉政。盛暑未嘗張蓋操扇。左右進蓋。必却之。曰。士衆尚多。

暴露。我何用此。五代史

尚書夏原吉治水浙西布衣徒步日夜經畫盛暑不張蓋曰民勞
吾何忍獨適。明史

鏡

帝會王母鑄鏡十二隨月用之此鏡之始也。

軒轅內傳

金精玉英冰輝沼清高堂懸影仁壽摘聲雲開月見水淨珠明。

仁壽

殿名殿前有大方鏡
梁簡文帝鏡銘

鏤五色之盤龍刻千年之古字山雞看而獨舞海鳥見而孤鳴臨

水則池中月出照日則壁上菱生。

庾信鏡賦

周靈王時異方貢石鏡此石色白如月照而如雪謂之月鏡。

拾遺記

韓房獻火齊鏡廣三尺閣中視物如畫。

高祖入咸陽宮。有方鏡廣四尺。表裏有明。人以手捫心。則見腸胃。五臟歷然無蔽。又女子有邪心。則膽張心動。秦皇以照宮人。西京雜記宣帝被收郡邸獄。臂上帶身毒國寶鏡。舊傳此鏡見妖魅。得佩之者。爲天神所福。故帝從危獲濟。常以琥珀筭盛之。

趙昭儀上姊趙后有七出菱花鏡一奩。

飛燕外傳

王度得古鏡於異人。侯生隋大業九年。有胡僧至云。宅上有碧光連日絳氣。屬月此寶鏡氣也。時河北疫癘。度持鏡照諸病者。卽熱定。病愈。夜夢人曰。我鏡精也。名曰紫珍。爲我謝王公。奈何使我反天救物。後忽匣中悲鳴。若龍咆虎吼。開匣視之。已失鏡矣。異聞錄

天寶三載。揚州進水心鏡一面。青瑩耀日。背有盤龍。勢如生動。唐記

呂蒙正爲相。有朝士藏古鏡。能照二百里。欲因公弟獻以求知。公曰。吾面不過櫟子大。安用照二百里。辭之。歸田錄

王希默以對鏡爲娛。收古今善鏡。結親友之蓄異鏡者。間日會飲。出鏡傳玩評品。鄉人目曰鏡社。又集凡言鏡者。成二十卷。號仙銅傳。清異錄

吳縣陳氏祖傳古鏡一具。徑八寸。凡患瘡者。執而自照。必見一物附於背。其狀蓬首鰲面。糊塗不可辨。一舉鏡而此物如驚。奄忽失去。病卽時愈。蓋瘡鬼畏見其形而遁也。世以爲寶。續已編

扇

新裂齊紈素。鮮潔如霜雪。裁成合歡扇。團圓似明月。古歌行

五明扇。舜所作也。廣開視聽。故作五明扇。秦漢公卿皆用之。魏晉非乘輿不得用。古今注

塗修國獻丹鵲。孟夏之時。鵲易毛羽。昭王聚鵲翅以爲扇。一曰遊

飄。二曰條翻。三曰虧光。四曰仄影。使二女搃此扇。泠然自涼。拾遺記

趙飛燕爲后。其女弟上襪。有孔雀扇。翠羽扇。九華扇。五明扇。西京雜記

庾懌爲豫州刺史。以白羽扇獻成帝。帝嫌其非新。侍中劉劭曰。栢

梁雲構大匠先居其下。管絃繁奏。夔牙先聽其音。懌之上扇以好

不以新。晉書

謝安有盛名。時多愛慕。鄉人有罷中宿縣者。詣安。安問其歸資。曰。有蒲葵扇五萬。安乃取其中者。提之。京師士庶競市。價增數倍。

袁宏出爲東陽郡謝安臨別取一扇授之曰聊以贈行宏曰輒當奉揚仁風惠彼黎庶

團扇歌者王珉與嫂婢謝芳姿情好甚篤嫂鞭撻過苦婢素善歌而珉好持白團扇故云歌曰七寶畫團扇粲爛明月光與郎却暄暑相憶莫能忘青青林中竹可作白團扇動搖郎玉手因風托方便團扇復向誰特許自障面顚顚無復理羞與郎相見杜氏通典

王元寶家有一皮扇每暑月宴客置扇坐側以新水灑之颯然風至客有寒色明皇命中使取視之曰此龍皮扇也天寶遺事

後蜀慧妃與後主登樓以龍腦末塗白扇扇墜地爲人所得蜀人

爭效其制名曰雪香扇十國春秋

明永樂中朝鮮進摺疊扇上喜其舒卷之便命工如式爲之亦謂

之撒扇潛確類書

奉天門常御朝座後內官持一小扇金黃絹以裹之嘗聞一老將

軍云非扇也其名卓影辟邪永樂間外國所進菽園雜記

劉瑾竊政一日贈翰林川扇有入而拜見者何瑋時官修撰獨長

揖瑾怒不以贈受贈者復拜謝瑋正色曰何僕僕也瑾大怒詰其

姓名瑋直應曰修撰何瑋明史

杖

竹之堪杖莫尙於筇磈磈不凡狀若人功豈必蜀壤亦產餘邦一

曰扶老名實縣同竹譜

仲秋縣道皆案戶比民年七十者授之玉杖端以鳩爲飾

漢書

孔光爲太師太后詔賜靈壽杖太師入省中用杖

靈壽木名似竹有節自然有合

杖制不須削治也

景帝嘗以山濤母老贈藜杖一枚

晉書

王遙有竹篴使弟子以九節杖擔之

神仙傳

後魏邢巒遷殿中侍御史嘗有疾策山桃杖帝問此何杖答曰巨

源杖按巨源山濤字太武諱燾故不敢言山桃借言巨源云

談藪

澄州產方竹勁挺堪爲杖不讓張騫邛竹杖也又海晏出蘆堪爲

拄杖更有踈節竹五六尺一節僧道多以爲杖

北戶錄

唐潤州甘露寺有僧道行孤高李德裕鎮浙右以方竹杖贈焉方

竹杖出大宛國堅實方正節眼鬚牙四面對出及德裕再鎮浙右

問僧竹方兄無恙否僧對曰已規圓而漆之矣公嗟惋累日桂苑叢談

石天麟年七十餘世祖以所御金龍頭杖賜之曰卿年老出入官

掖杖此可也元史

羅復仁進弘文館學士尋乞致仕已又召至京師留三月賜玉帶

鐵拄杖裘馬食具遣還明史

盤盥

美人贈我金琅玕何以報之雙玉盤美人贈我錦繡段何以報之

青玉案案卽梳
漢張衡詩

明帝承露盤在芳林園中上盤徑四尺九寸下盤徑五尺銅龍繞

其根。

陳思王集

晉太康四年。林邑王獻縹紺水晶盤各一。

交州雜事

王公與朝士飲。舉瑠璃盤。謂伯仁曰。此盤腹殊空。謂之寶器何耶。

答曰。此盤英英。誠為清徹。所以為寶耳。

世說

開皇十一年。突厥遣使獻七寶盤。

隋書

高祖賜王公以下射。楊素箭第一。上以外國所獻金精盤。價直巨萬。以賜之。

代宗時。路嗣恭進琉璃盤。徑九寸。以為至寶。及籍元載家。得琉璃

盤。徑一尺。

唐書

馬侍中嘗寶一玉精盤。夏蠅不近。盛水經月不耗。或目痛。含之立

愈。孔帖

巴東下巖院僧。水際得青磁碗。折花及米其中皆滿。以錢及金銀置之皆然。自是富厚。僧年老。擲盃江中。謂徒弟曰。不欲爾等增罪。

累也。

秘閣閒談

麟州李繼捧來朝。其祖母獨孤氏獻玉盤一。金盤三。太宗厚賚之。
宋史

鐵哥進中書平章政事。成宗賜以瑪瑙碗。謂曰。此器先皇所用。朕今賜卿。以卿久侍先皇也。
元史

張榮實從軍淮上。賞銀碗。李璫叛。討平之。賞金盃。

真臘國幅員廣數千里。國中有金塏金橋。殿宇三十餘所。歲時一

會羅列玉猿孔雀白象犀牛於前。名曰百塏洲。盛食以金盤金碗。故有富貴眞臘之諺。明史

杯

爵夏后氏以琖。殷以斚。周以爵。禮記

尸飲五。君洗玉爵獻卿。尸飲七。以瑤爵獻大夫。尸飲九。以散爵獻士及羣有司。

周穆王時。西胡獻夜光常滿盃。盃是白玉之精。光明夜照。夕出盃於中庭。比明而水汁已滿於盃中也。十洲記

劉表有酒器三大。曰伯雅。受七升。次仲雅。受五升。次季雅。受三升。
典論

崔洪手不執珠玉。汝南王亮譙公卿以琉璃鍾行酒。酒及洪。洪不

執。晉書

梁宴魏使魏肇。師勸以鸚鵡杯。山堂肆考

胡楚賓屬文敏速。飲酒半酣而後操筆。高宗每令作文。必以金銀

杯盛酒令飲。便以杯賜之。唐書

唐內庫有酒杯。青玉色。足上鏤字曰自暖。杯上令取酒注之。溫溫

然有氣。少頃如湯。開元遺事

李適之有酒器九品。蓬萊盞。海川螺。舞仙盞。瓠子卮。幔捲荷。金蕉

葉。玉蟾兒。醉劉伶。東溟樣。逢原記

唐李宗閔暑月臨池。以荷爲杯。語林

唐明宗時水運軍將於臨河縣得一玉杯。有文曰傳國寶萬歲杯。

明宗甚愛之。以示宰相。五代史

劉重進克泰州。入楊行密子孫家。得玉杯盤水晶盞以獻。宋史

僕散揆宣撫江南。會天壽節。世宗命其子持白玉杯以飲。揆及揆

復取臨淮蘄縣。上遣近侍賜玉荷蓮盞。金史

撒馬兒罕。洪武二十七年貢馬進表。表內云。欽仰聖心如照世之杯。使臣心中豁然光明。照世杯者。其國舊傳有杯。光明洞徹。照之

可知世事故云。明史

古里國富家多植椰子樹。至數千。其嫩者漿可飲。亦可釀酒。老者可作油糖。亦可作飯。榦可構屋。葉可代瓦。殼可製杯。穰可索綯。煨

為灰可鑲金

箸

羹之有菜者用挾。其無菜者不用挾。挾箸也。禮記

殷王紂始為象箸。史記

條侯周亞夫為丞相。景帝居禁中。召條侯賜食。獨置大胾。不置櫡。

條侯心不平。顧謂尚席取櫡。

趙婕妤上趙后有文犀辟毒箸二雙。飛燕外傳

王莽時有奇士巨毋霸。卧則枕鼓。以鐵飭食。謝承後漢書

沈慶之登三事。孝武以金鏤匕箸賜之。曰。觴酌之賜。宜以大夫為

先。南史

明皇賜宋璟以所用金筯曰非賜汝金蓋賜卿筯表卿直也。開元遺事

後蜀高祖以李皇后故優待唐莊宗諸兒賜予千計敕器用局以

沉香降真爲鉢木香爲匙箸。十國春秋

爐

金猊寶鼎寶鴨金鳧皆焚香器也。潛確類書

巧工丁緩作卧褥香鑪一名被中香鑪又作九層博山香鑪鏤爲

奇禽怪獸窮諸靈異皆自然運動。西京雜記

陶弘景母郝氏夢兩天人手執香爐來至其所已而有娠。南史

王元寶於寢帳前雕二童捧七寶博山爐自暝焚香徹曉。天寶遺事

田忠良通星歷伯顏獻宋寶有玉香爐世祖以賜忠良。元史

燈

南油俱滿。西漆爭燃。蘇微安息。蠟出龍川。斜輝交映。倒影澄鮮。梁簡

文帝看
燈賦

乃有百枝同樹。四照連盤。香添然蜜。氣雜燒蘭。燼長宵久。光青夜寒。秀華掩映。蛺膏照灼。動鱗甲於鯨魚。燄光芒於鳴鶴。輝輝朱燼。焰焰紅榮。乍九光而連彩。或雙花而並明。庾信
燈賦

穆王設長生之燈。以自照。一名恒輝。又有鳳膺之燈。拾遺記

高祖入咸陽宮。有青玉五枝燈。高七尺五寸。作蟠螭。以口含燈。燈

燃鱗甲皆動。煥炳若列星而盈室焉。西京雜記

巧工丁緩。爲常滿燈。七龍五鳳。雜以芙蓉蓮藕之奇。

七月七日。掃除宮掖。燃九微之燈。漢武內傳

魏武帝正會文昌殿。用漢儀設百華燈。晉書

韓國夫人置百枝燈樹。高八尺。上元夜燃之。百里皆明。開元遺事

遼聖宗統和元年十二月。然萬漁燈於雙溪。續文獻通考

燭

夜未央。庭燎之光。庭燎大燭也。詩經

日短苦夜長。何不秉燭遊。古詩

熒熒華燭。爾不是照華燭何為。秦嘉贈婦詩

銀燭吐清烟。獨宿江城蠟炬殘。唐詩

羊侃性豪侈。宴魏使陽斐。至夕侍婢百餘人。俱執金花燭。梁書

令狐綯爲翰林承旨。夜對禁中。燭盡。宣宗以乘輿金蓮華炬送還。院吏望見。以爲天子來。及綯至。皆驚。唐書

申王以龍檀木刻童子。綠衣束帶。每遇夜集。列執畫燭。謂之燭奴。

天寶遺事

寇準性豪侈。家未嘗燕油燈。雖庖廩所在。必燃炬燭。宋史

秦檜當國。廣東帥方滋德爲蠟炬。以衆香實其中。遣卒餽相府。檜

一日宴客。乃取用之。俄而異香滿座。則自燭中出也。檜大喜。齊東野語

杭人削松木爲小片。其薄如紙。鎔硫黃塗其銳。名曰發燭。亦曰燂

兒。蓋以發火。代燈燭用也。陶學士清異錄。一夜有急。苦於作燈之

緩。批杉染硫黃。遇火卽燄。呼爲引光奴。今遂有貨者。其名頗新。西湖

志

香

密香。沉香。雞骨香。黃熟香。雞舌香。棧香。青桂香。馬蹄香。按此八物。同出於一樹。珍異之木也。草木狀

漢元封中。燒天下異香。有沉光香。精祇香。明庭香。金磬香。塗魂香。招仙閣上。燒荃薜香。燒粟許。其氣三月不絕。洞冥記

西使至。奏其香。武帝付外庫。後長安中大疫。西使請燒所貢香。以辟疫氣。帝聽之。病者並差。百里盛聞香氣。積九十餘日不歇。博物志

辟寒香。丹丹國所出。漢武時入貢。每至大寒。焚之。暖氣翕然。聚窟洲有返魂樹。伐其根心。煮汁熬丸。名返生香。死尸聞氣即活。述異記

南海山出千步香。佩之香聞於千步。

淮南王爲八公燔百和之香。神仙傳

吳主亮寵姬合四氣香。香氣沾衣。百浣不歇。名曰百濯香。拾遺記

韓壽與賈充女私。時西域有貢奇香。一着人。則經月不歇。武帝甚

貴之。惟以賜充。充女密盜以遺壽。晉書

劉季和性愛香。嘗如廁還。輒過香爐上。謂主簿曰。苟令君至人家。

坐席三日香。謂我何如令君。襄陽記

昭宗嘗賜崔徹香一黃綾角。焚大豆許。終日旖旎。御題曰。刀圭第

一香。清異錄

宋學士梅詢喜焚香。每晨將視事。必焚香兩爐。以公服罩之。出則

兩袖郁然。

事文類聚

龍涎於香中最貴重。出大食國。海傍有雲氣籠照。其下有龍蟠卧。雲散龍去。往探可得。其遺涎多不過數兩。香譜

案几

春官司几筵。掌五几。玉几。雕几。彤几。漆几。素几。凡吉事變几。凶事

仍几。

周禮

漢制。天子玉几。冬則加綈錦其上。謂之綈几。公侯以竹木爲几。細

罽爲橐以憑之。

西京雜記

韓康伯母殷隱古几毀壞。卞鞠欲易之。答曰。我若不隱此。汝何以

得見古物。

世說

謝霜回有七寶靈檀之几。几上有文字。隨意所及。文字輒見。故道

經云。世有靈檀。則百事可圖。

元觀手抄

王羲之嘗詣門生家。見棐几滑淨。因書之。真草相半。後其父誤刮之。門生驚懊。累日。

晉書

沈麟士隱居。以篤學爲務。恒憑素几。

南史

江秉之爲新安太守。在郡作書案一枚。去官留以付庫。

屏風

梁孝王遊於忘憂之館。牟勝爲屏風賦。其辭曰。屏風韜匝。蔽我君王。重葩累繡。沓璧連璋。飾以文錦。映以流黃。畫以古列。頤頤叩叩。藩后宜之。壽考無疆。

西京雜記

何敞爲汝南太守。章帝南巡過郡。有雕鏤屏風。爲帝設之。帝命侍

中黃香銘之曰。古典務農。雕鏤傷民。忠在竭節。義在脩身。

三輔決錄

鄭弘爲太尉。時舉將第五倫。班次在下。每朝見。弘曲躬而自卑。章帝問知其故。遂置雲母屏風。分隔其間。由此以爲故事。

後漢書

薛夜來初入魏宮。一夕文帝在燈下詠以水晶七尺屏風障之。夜來至。不覺面觸屏上。傷處如曉霞將散。

瑯嬛記

吳主亮作琉璃屏風。甚薄而瑩徹。每月下舒之。使四姬坐屏風內。而外望之。如無隔者。

拾遺記

明皇以虹霓屏賜楊妃。其上雕刻美人。可三寸許。服玩之器皆用

衆寶雜廁而成。精巧殆非人製。

楊妃外傳

簾

越以美女夷光修明貢吳。吳處以椒華之房。貫細珠爲簾幌。朝下以蔽景。夕捲以待月。拾遺記

漢武帝招仙閣上。以翠羽麟毫爲簾。洞冥記

昭陽殿織珠爲簾。風至則鳴。如珩佩之聲。西京雜記

秦王苻堅。國內殷實。懸珠簾於正殿。以朝羣臣。晉書

夏侯亶性節儉。不事華侈。晚頗好音樂。有妓妾數十人。無被服姿容。每有客。嘗隔簾奏樂。時謂簾曰。夏侯妓衣。梁書

沈麟士居貧。織簾誦書。口手不息。鄉里號爲織簾先生。南史

夜明簾。雞林國所獻。張說得之。進九公主以解難。海錄

同昌公主出降。堂中設却寒之簾。類玳瑁斑。却寒鳥羽所成。同昌外傳
明成化中閣門。夏秋懸朱筠簾。冬春紫氍簾。瑣綴錄

牀

牀三尺五曰榻。八尺曰牀。通俗文

孟嘗君聘於楚。楚王遺之象牀。不受。史記

漢武帝神明臺上。設金牀象席。洞冥記

武帝爲七寶牀。設於桂宮。韓嫣以玳瑁爲牀。西京雜記

宋高祖有熱病。有人獻石牀。寢之極以爲佳。乃歎曰。木牀且費。而

况石耶。令毀之。南史

魚弘服玩窮一時之絕。有眠牀一張。皆是蹙柏。四面周匝。無一有

異通用銀鏤金花壽福兩重爲脚

神策軍脩苑內掘得白玉牀其長六尺以獻

舊唐書

唐御史食座之南橫設榻謂之南床例不出累月遷登南省故號

南床百日御史臺記云亦曰癡牀言倨傲如癡

通典

沙門支法存有八尺沉香牀

異苑

帳

紅羅複斗帳四角垂香囊

古詩

武帝以琉璃珠玉雜錯珍寶爲甲帳次爲乙帳甲以居神乙以自

居

漢武故事

成帝賜趙后紫茸雲氣帳后加號婕妤好奏賀后報以雲錦五色帳

倖好怨帝曰。非姊賜。我不知此。帝謝之。爲倖好作七成錦帳。飛燕外傳

石虎冬月用明光錦。白縑爲裡。名複帳。四角安金銀鑿鏤香爐。燕

百和香。帳頂安金蓮花。中懸金箔織成錦囊。鄴中記

高祖時。吳王杜伏威獻竹帳。上以勞人不受。唐書

張易之爲母臧。作七寶帳。有魚龍鸞鳳之形。

元載有紫綃帳。蓋鮫綃之類。嚴冬風不能入。盛暑則涼自生。色隱

隱然。不知爲帳。惟見卧內紫氣而已。杜陽雜編

錢鏐夫人嘗以王寢帳隙裂。乃造青縑帳。將易之。王曰。作法於儉。

猶恐其奢。但慮後代皆施錦繡耳。卒不用。吳越備史

枕

角枕粲兮。詩經

設元珉雕枕。刻黑玉銅鏤。爲日月雲雷之狀。亦曰鏤雲枕。洞冥記

李廣獵見虎射之斃。斷其髑髏以爲枕。示服猛也。西京雜記

魏明帝檢寶庫中。得一玉虎頭枕。其領下有篆書云。帝辛之枕。是

殷時遺寶也。拾遺記

宋高祖時。寧州獻虎魄枕。光色甚麗。價盈百金。南史

韋后妹七姨嫁將軍馮太和。爲豹頭枕。以辟邪。白澤枕。以辟魅。伏

熊枕。以宜男。舊唐書

號國夫人有夜明枕。光照一室。不假燈燭。古奇器錄

龜茲國進一枕。色如瑪瑙。枕之則十洲三島。四海五湖。盡在夢中。

帝名之爲遊仙枕。

開元遺事

韋弁遊蜀郡遇玉清之女。贈以紅氍毹枕。弁挈還長安。有胡人見而拜曰。此仙家之寶枕。似玉微紅。有文如粟。奇光炳然。宣室志

盧文紀有玉枕骨。故凡枕之堅實者皆不可用。親舊皆作楊花枕贈之。遂獲安寢。自是縫青繒。充以柳絮。計一年一易。清異錄

司馬溫公常以圓木爲警枕。少睡則枕轉而覺。

潛確類書

王磐爲太常卿。世祖閣內府珍玩有碧玉寶枕。因出賜之。

元史

偶武孟吳之太倉人也。有詩名。嘗爲武岡州募官。因鑿渠得一瓦枕。枕之。聞其中鳴鼓起。插一更至五更。鼓聲次第更轉不差。旣聞雞鳴。亦至三唱而曉。抵暮復然。武孟以爲鬼怪。令碎之。及見其中

設機局以應夜氣。識者謂為諸葛武侯鷄鳴枕也。客座新聞

被

客從遠方來。遺我一端綺。文綵雙鴛鴦。裁為合歡被。古詩

尚書郎入直臺中。官供新青縑白綾被。或錦被。漢官儀

邊讓才辨俊逸。孔融薦於魏武。曰。邊讓為九州之被則不足。為單衣襜褕則有餘。

裴之橫少好賓遊。兄之高以其縱誕。為狹被蔬食以激厲之。之橫歎曰。大丈夫富貴必作百幅被。及封豫章侯。除吳興太守。乃作百幅被以成其志。梁書

唐元和八年。大軫國貢神錦被。冰蠶絲所織也。其上龍文鳳彩。殆

非人工。暑月覆之。清凉透體。

杜陽雜編

貫酸齋過梁山樂。見漁父織蘆花爲被。欲易以紬。漁父疑其爲人。

陽曰。欲吾被當賦詩。遂援筆立成。持被去。人間喧傳蘆花被。詩元

劉崧拜國子司業。天性廉慎。十年一布被。鼠傷始易之。仍葺以衣

其子。明史

席簟

下莞上簟。乃安斯寢。詩經

簟。宋魏之間謂之笙。方言

有虎鬚草。江東織以爲席。號曰西王母席。古今注

瓊州出紅藤簟。或謂之蘧除。亦謂之行唐。色殷紅。瑩而不垢。

北戶錄

周穆王時西王母來敷碧蒲之席黃莞之薦拾遺記

燕昭王設麟文席錯雜寶以飾席也皆為雲霞麟鳳之狀

武帝以象牙為簟賜李夫人西京雜記

會稽歲時獻竹簟供御世號為流黃簟

趙昭儀昭陽殿中有綠熊席毛長尺餘

唐侯君集破高昌所得金簟甚精御府所無盧氏雜記

張易之為母臧作犀簟唐書

唐憲帝迎佛骨入內設龍鱗之席杜陽雜編

大中中召處士伊祁元入宮設紫菱席光軟香淨冬溫夏涼烏弋

山離國所獻

唐申王取豬毛刷淨令巧工織壬癸席滑而且涼。

湘東備錄

洪武元年夏四月。蘄州進竹簟。却之。令四方毋妄獻。

明史

褥

周靈王起昆昭之臺。設紫氍毹。文褥。是西域所獻。施於臺上。坐者皆

溫。拾遺記

薦蛟毫之白褥。此毫柔而冷。常以夏日舒之。因名柔毫褥。

洞冥記

趙昭儀上皇后。綈有鴛鴦褥。

西京雜記

元載寵姬薛瑤英。有却塵褥。出高句驪國。是却塵獸毛所爲。色殷

鮮光軟無比。

杜陽雜編

王淵爲御營都統制。高宗聞淵疾。茵褥不具。輟所御紫茸茵以賜。

宋史

設玉類編

卷三十六 器用類

三

資履堂

宋史

穀玉類編卷三十七

休寧 汪兆舒果齋輯

文具類

書

筆

墨

硯

紙

書

河間獻王德修學好古。從民得善書。必爲好寫與之。畱其真。加金帛。賜以招之。由是四方舊書多奉獻王。故得書多。與漢朝等。漢書

武帝時。以書頗散亡。使謁者陳農求遺書於天下。詔劉向等校書。張華雅愛書籍。嘗徙居。載書三十乘。秘書監摯虞撰定官書。資華

之本以取正。天下奇秘。世所希有者。悉在華所。由是博物洽聞。晉書

崔慰祖好學。聚書至萬卷。隣里好事者。來從假借。日數十裘。慰祖

親自取與。未嘗辭。南齊書

沈約好墳籍。聚書至二萬卷。京師莫比。梁書

任昉家雖貧。聚書至萬餘卷。率多異本。

常景耽好經史。若遇新異之書。殷勤求訪。或復質買。不問價之貴

賤。必以得爲期。魏書

秘書監牛弘表請分遣使人搜訪異本。每書一卷。賞絹一匹。校寫

既定。本卽歸主。於是民間異書。往往間出。平陳以後。經籍漸備。隋書

唐貞觀中。魏徵。虞世南。顏師古。繼爲秘書監。請購天下書。選工書

者繕寫藏於內庫。元宗命兩都各聚書四部。以甲乙丙丁爲次。列經史子集四庫。其本有正。有副。軸帶帙籤皆異色以別之。唐書

蘇升聚書至二萬卷。手自讎定。當時稱與秘府埒。

方城縣侯韋述蓄書二萬卷。皆手校定。黃墨精嚴。內秘書不逮也。

李溪家有書至萬卷。世號李書樓。

御史中丞趙安仁所得祿賜多以購書。三館舊缺。虞世南北堂書鈔。惟安仁家有本。真宗命內侍取之。嘉其好古。手詔褒美。宋史

眉山孫長孺善藏書。號書樓孫氏。

宋次道家藏書皆校讎三五遍。世之藏書以次道家爲善本。住在春明坊。士大夫喜讀書者多僦居其側。以便於借觀故也。東都事畧

高宗搜訪遺聞。屢優獻書之賞。館閣編錄。日益以富。當時類次書目。得四萬四千四百八十六卷。至寧宗時。續書目。又得一萬四千九百四十三卷。視崇文總目。有加矣。文獻通考

南渡後。惟葉少蘊收書逾十萬卷。置之雪川弁山。山居建樓以貯之。揮麈錄

宋末。惟直齋陳氏書最多。至五萬一千八百餘卷。且倣讀書志作解題。極爲精核。鴻書

周恕家無儋石之儲。而聚書數萬卷。扁所居曰渠菴。元史

申屠致遠聚書萬卷。名曰墨莊。

李開先官至太常少卿。性好蓄書。李氏藏書之名聞天下。明史

曹學佺嘗謂二氏有藏吾儒何獨無欲修儒藏與鼎立擷四庫書因類分輯十有餘年功未及竣

筆

筆所以書也。楚謂之聿。吳謂之不律。燕謂之拂。秦謂之筆。說文

自古有書契來便應有筆。世稱蒙恬造筆何也。曰恬始造卽秦筆耳。以枯木爲管。鹿毛爲柱。羊毛爲被。所謂蒼毫。非兔毫竹管也。問彤管曰彤者赤漆耳。史官載事用彤管。用赤心記事也。古今注

天子筆管以錯寶爲跗。毛皆以秋兔之毫。西京雜記

製筆之法。桀者居前。毳者居後。强者爲刃。弱者爲輔。參之以隸。束之以管。固以漆液。澤以海藻。濡墨而試。直中繩。勾中鉤。圓中規。矩

終日握而不敗。故曰筆妙。此數言簡約。未知誰所為。可題為筆經。

春風堂

隨筆

漢制尚書丞郎月賜赤管大筆一雙。

宋書百官志

張華博物志成。武帝賜之麟角筆。以麟角為管。遼西國所獻。拾遺記

紀少瑜嘗夢陸倕以一束青鏤管筆授之。云我以此筆猶可用。卿

自擇其善者。其文因此適進。

南史

元帝為湘東王時。筆有三品。忠孝全者。用金管書之。德行精粹者。

用銀管書之。文章瞻麗者。用斑竹管書之。

梁書

李白少時夢筆頭生花。自是才思瞻逸。

天寶遺事

歐陽通書亞於父詢。晚自矜重。以狸毛為筆。覆以兔毫。管皆象犀。

非是未嘗書。唐書

司空表聖芟松枝爲筆管。人問之曰。幽人筆當如是。汗漫錄

中書令史弼肇曰。安朝廷。定禍亂。須長槍大劍。若毛錐子安足用。

哉。三司使王章曰。無毛錐子。軍賦何從集乎。毛錐子。筆也。弼肇默

然。五代史

錢俶獻草書。太宗賜紅綠象牙管筆。宋史

真宗祥符二年。內出太宗鏤文紅管筆。分賜宰相。人一雙。玉海

蔡君謨爲歐陽永叔寫集古目錄序。歐以鼠鬚栗尾筆。銅綠筆格

等爲潤筆。君謨笑以爲太清而不俗。山堂肆考

劉三吾遷翰林學士。太祖製詩。時令屬和。嘗賜以朝鮮玳瑁筆。明史

墨

上古無墨。竹挺點漆而書。中古以石磨汁。或云是延安石液。魏晉時始有墨丸。乃漆烟松煤爲之。晉人用凹心硯者。欲磨墨貯瀋耳。

自後有螺子墨。亦墨丸遺製。洞天清錄

尚書令僕丞郎。月賜隃麋大墨一枚。小墨一枚。漢官儀

元宗置修書院。太府每季給上谷墨三百六十九丸。唐書

元宗御案墨曰龍香劑。一日見墨上有小道士如蠅而行。上叱之。

對曰。臣墨之精。黑松使者。凡世人有文者。其墨上有龍賓十二種。

種異相。上神之以墨分賜掌文官。陶家瓶餘

薛稷爲墨拜松燕督護元香太守。纂異記

古有九子之墨祝婚者多子祝曰九子之墨成於松烟本姓長生

子孫無邊文房四譜

上黨松心為墨尤佳

祖氏陽定人唐之墨官也世以易水墨為上祖氏之名聞天下

李廷珪本易水人唐末到歙州以其地多松因畱居以墨名家其

墨有劍脊圓餅面多有龍紋宋嘉祐中仁宗宴近臣於羣玉以其

墨賜之曰新安香墨其後翰林承旨賜者皆雙脊品尤佳小窗清紀

贈君烏玉玦泉清硯須潔避暑懸葛囊臨風度梅月廷珪藏墨訣

沈珪嘉禾人悟對膠法故其墨銘曰沈珪對膠十年如石一點如

漆此最佳品也何遠墨記

造墨之妙者。魏無過韋誕。五季無過李廷珪父子。其墨浸水中。三年不壞。宋有潘谷。元有朱萬初。虞允靖稱萬初墨沈著而無畱蹟。輕清而有餘潤。潛確類書

唐寅少嘗乞夢九鯉仙。夢贈墨一擔。自是才思益進。列朝詩集小傳

新安吳棫好讀書鼓琴。布衣芒屨。寥然自異。倣易水法製墨。遇通人文士。倒囊相贈。富家翁厚價贖之。輒大笑曰。勿以孔方兄辱吾客卿也。

硯

端溪出硯有三種。巖石爲上。西坑次之。後磨一作歷又次之。東軒筆錄

歙州龍尾亞於端溪。

文房四譜

黃帝得玉一紐治爲墨。海上有篆文曰帝鴻氏之硯。李之彦

魏銅雀臺遺址人發其古瓦琢硯甚工貯水數日不燥。

張華博物志成武帝賜以青鐵硯此鐵于閩國所獻而鑄爲硯也。

拾遺記

儒生高常路獲硯石似馬蹄狀外棱孤聳內發墨色幽奇天然疑

神仙遺物寶而用之請予銘底銘曰仙馬有靈跡在於石棱而宛

中有點墨迹文字之祥君家其昌。韓文公集

柳公權所寶惟筆硯圖書常評硯以青州石爲第一絳州黑硯次

之。舊唐書

包拯爲端州守州歲貢硯前守所取輒數十倍以遺權貴拯命製

者止足供數。後官滿。一硯不持以歸。宋史

給事中唐詢好畜硯。客至輒出而玩之。有硯錄三卷。

太宗會同四年。晉遣使進水晶硯。遼史

楊黼庭前有大桂樹。縛板樹上。題曰桂樓。偃仰其中。歌詩自得。所用硯乾。將下樓取水。硯池忽滿。自是爲常。時人咸異之。明史

汪偉屢遷南京國子祭酒。武宗以巡幸至江彬。矯旨取玉硯。偉曰。有秀才時故硯。可持去。

士女曹妙清。錢塘人。善鼓瑟。工詩。三十不嫁。風操可尚。嘗寫詩寄

楊鐵崖。鐵答之云。紅牙筦蒂紫狸毫。雪水初融玉帶袍。寫得薛濤

萱草帖。西湖紙價可能高。其事母孝謹。故云玉帶袍。其家硯名。列

詩集
小傳

紙

方絮曰紙。通俗文

紙之妙者。則越之剡藤。苔牋。蜀之麻。薛骨。金花。土屑。魚子。十色牋也。國史補

自古書契。多編以竹簡。其用縑帛者。謂之紙。縑貴而簡重。並不便於人中。常侍蔡倫。乃造意。用樹膚。麻頭。及敝布。魚網。以爲紙。奏上之。和帝善其能。自是莫不從用。故天下稱蔡侯紙。後漢書

蔡倫後有左伯。善造紙。齊蕭子良與王僧虔書。子邑之紙。研妙輝

光。潛確類書

張華博物志成。武帝賜以側理紙萬番。此南越所獻。拾遺記

蜜香紙。以蜜香樹皮葉作之。香而堅韌。水漬之不爛。太康五年大

秦國獻三萬幅。帝以萬幅賜杜預。南方草木狀

桓元令平淮作桃花紙。有縹綠青赤等色。桓元偽事

江寧縣有紙官署。齊高帝造紙所也。嘗造凝光紙。賜王僧虔。一云

銀光。丹陽記

薛稷爲紙拜楮國公。白州刺史。統領萬字軍。纂異記

益州舊貢薛濤十色牋。短狹纔容八行。寰宇記

蜀主衍以霞光箋五百幅。賜金堂令張蠙。寫詩以進。蜀志

南唐李後主造澄心堂紙。細薄光潤。潛確類書

高麗紙以綿繭造成。色如白綾。堅韌如帛。用以書寫。發墨可愛。此中國所無。亦奇品也。

元有春膏冰玉二箋。魀色尤奇。又以繭紙作蠟色。兩面光瑩。多寫大藏經。傳流於世。

明大內各箋。不如宣紙。有楮皮者。韋細而白。可作書。有宣德五年

造素馨紙印。

通雅

江淵。江津人。景泰初。入閣預機務。東宮既易。加太子少師。英宗卽位。謫戍遼東。初黃珣之奏易儲也。或疑淵主之。邱濬曰。此易辨也。廣西紙與京師紙異。素奏視之。果廣西紙。其誣乃白。成化初復官。明史

穀玉類編卷三十七

穀玉類編卷三十八

休寧 汪兆舒果齋輯

音樂類

樂器

笙

鼓

鐘

琵琶

磬

簫

琴

管

瑟

笛

樂器

金之屬二。一曰鐃鐘。每鐘懸一簣。虛。二曰編鐘。小鐘也。編而懸之。

上下皆八。懸一簣。虛。以下並隋書音樂志

石之屬。一曰磬。用玉若石爲之。

絲之屬四。一曰琴。神農制爲五絃。周文王加二絃爲七絃。二曰瑟。二十七絃。伏羲所作。三曰筑。十三絃。四曰箏。十三絃。蒙恬所作。竹之屬三。一曰簫。十六管。舜所造。二曰箎。八孔。蘇公所作。三曰笛。十二孔。漢邱仲作。

匏之屬二。一曰笙。二曰竽。並女媧所作。

土之屬一。一曰埙。六孔。暴辛公所作。

革之屬五。一曰建鼓。夏后氏加四足。謂之足鼓。殷人柱貫之。謂之楹鼓。周人懸之。謂之懸鼓。近代相承。植而貫之。謂之建鼓。靈鼓。靈鼗。並八面。雷鼓。雷鼗。六面。路鼓。路鼗。四面。又有節鼓。

木之屬二。一曰祝。二曰敔。

鐘

凡金爲樂器有六。皆鐘之類也。曰鐘。曰鐃。曰鐃。曰鐃。曰鐃。曰鐃。如鐘而大。鐃。鐃于也。圓如椎頭。上大下小。所謂金鐃和鼓也。鐃。鈺也。形如小鐘。軍行爲鼓節。鐃如鈴而無舌。有柄而執之。鐃如大鈴。

古今

樂錄

鐘者世本云。黃帝工人垂所造。爾雅云。大鐘曰鏞。中者曰剽。小者曰棧。晉江左初所得棧鐘是也。宋書

顓頊有浮金之鐘。以羽毛拂之。則聲振百里。拾遺記

垂之和鐘。禮記

齊景公鑄大鐘。撞之於庭。郊雉皆雊。淮南子

漢武帝時未央宮前殿鐘無故自鳴三日三夜不止詔問東方朔曰臣聞銅者山之子以陰陽氣類言之子母相感山恐有崩弛者居三日南郡上書言山崩

東方朔傳

張永曉音律宋孝武問永以太極殿前鐘聲嘶永答鐘有銅滓乃扣鐘求其處鑿而去之聲遂清越

南齊書

龍華寺有鐘撞之聞五十里蕭綜來降聞此鐘聲以爲奇異造聽

鐘歌三首

伽藍記

張文收善音律太樂有古鐘十二近代惟用其七餘五俗號啞鐘莫能通者文收吹律調之聲皆響徹

舊唐書

宣宗時涪陽耕者得古鐘高尺餘楊收叩之曰此姑洗角也旣剗

拭有刻在兩樂果然。唐書

磬

磬世本云。叔所造。以玉爲之。大曰磬。磬。叔堯之臣。宋書。

叔之離磬。禮記。

曼擊鳴球。徐州貢泗濱浮磬。書經。

穆王時有浮瀛羽磬。青石爲磬。輕若鴻毛。因輕而鳴。拾遺記。

漢武帝招仙閣上。懸浮金輕玉之磬。騰光臺上。擊懸黎之磬。洞冥記。

成帝時。於犍爲水濱。得石磬十六枚。劉向說上宜興辟雍。設膠序。

隆雅頌之音。以風化天下。漢書。

太真善擊磬。上令採藍田綠玉琢成磬。極精巧。楊妃外傳。

江南李建勳蓄一玉磬以沉香節扣之聲極清越或有談猥俗之語則急起擊磬數聲曰聊以清耳澄懷錄

磬玉山在耀州出青石可以為磬自唐朝採用而泗濱之石遂廢白居易有詩紀之九域志

琴

昔者舜作五絃之琴以歌南風禮記

古琴曲十二將歸操孔子將之晉聞晉殺實鳴犢舜華而作猗蘭操孔子傷不遇時而作龜山

操季桓子受女樂孔子去魯望龜山作此越裳操周公作拘幽操文王拘羑里作岐山操周人為太

王履霜操尹吉甫之子伯奇無罪見逐而作朝飛操牧犢子年七十無妻見雉朝飛而作別鶴操商

牧子娶妻五年父母欲為改娶其妻悲感而作殘形操曾子夢一狸不見其首而作水仙操懷陵操並

牙作。
琴操。

齊桓曰號鐘。楚莊曰繞梁。相如曰焦尾。伯喈曰綠綺。

傅玄琴賦

司馬相如客臨邛。臨邛富人卓王孫爲具召之。并召令酒酣。臨邛令前奏琴。曰聞長卿好之。願以自娛。相如辭謝爲鼓一再行。是時卓王孫有女文君新寡好音。相如以琴心挑之。文君夜亡奔相如。史記

趙后有寶琴曰鳳凰。后亦善爲歸風送遠之操。

西京雜記

蔡邕善鼓琴。在吳。吳人有燒桐以爨者。邕聞火烈之聲。知其良木。

因請而裁爲琴。果有美音。而其尾猶焦。時人名曰焦尾琴。

後漢書

嵇康好彈琴。及將刑東市。索琴彈之。曰昔袁孝尼從吾學。廣陵散。

吾每靳之。廣陵散於今絕矣。初康嘗游洛西。暮宿華陽亭。引琴而彈。忽有客詣之。稱是古人。與康共談音律。因索琴彈之。而爲廣陵散。聲調絕倫。遂以授康。晉書

阮瞻善彈琴。人聞其能。多往求聽。不問貴賤長幼。皆爲彈之。

戴逵能鼓琴。太宰武陵王晞聞其善鼓琴。使人召之。逵對使者破琴曰。戴安道不爲王門伶人。

戴顓父逵善琴。顓傳之。父沒。所傳之聲。不忍復奏。與兄勃各造新弄。衡陽王義季從之游。顓爲義季鼓琴。並新聲變曲。宋書

侍中褚彥回嘗聚袁粲舍。初秋涼夕。風月甚美。彥回援琴奏別鶴之曲。宮商旣調。風神諧暢。王或謝莊在粲坐。撫節而嘆曰。以無累。

之神合有道之器宮商暫離不可得已。南史

尚書令柳世隆善彈琴。世稱柳公雙瓊。爲士品第一。在朝不干世務。垂簾鼓琴。風韻清遠。南齊書

柳惔。世隆子也。初宋世有嵇元榮。羊蓋並善琴。惔從之學。特窮其妙。竟陵王子良引爲參軍。王嘗置酒後園。有晉相謝安鳴琴在側。援以授惔。惔彈爲雅弄。子良曰。卿巧越嵇心妙。臻羊體良。質美手信。在今辰。豈止當世稱奇。足可追蹤古烈。梁書

鄭述祖能鼓琴。自造龍吟十弄。云嘗夢人彈琴。寤而寫得。當時以爲絕妙。北齊書

司諫崔遵度善鼓琴。得其深趣。有小閣。朝退默坐其上。彈琴獨酌。

條然自適。宋史

李汧公嘗取桐孫之精者雜綴謂之百納琴。用蝸殼爲徽。其間三

面尤絕異。通謂之響泉韻磬。異絲爲絃。一上可十年不斷。尚書故實

饒定王佑榮有名琴曰天風環珮。寧王宸濠求之不得。嗾鎮守太

監黎安奏佑榮過失。明史

皇甫濂少學琴於雲間張氏。晚更精詣。撰述之下。鼓琴一二行。謂

足玩世遺榮也。列朝詩集小傳

瑟

秦帝使素女鼓五十絃瑟。悲帝禁不止。故破其瑟爲二十五絃。漢書

清廟之瑟。朱絃而疏越。壹倡而三歎。有遺音者矣。禮記

雲和之琴瑟。雲和山名出美木作為瑟其聲清亮。周禮

瑟曰文鵠仙樂也。致虛雜俎

瓠巴鼓瑟而淫魚出聽。淮南子

高帝戚夫人善鼓瑟帝常擁夫人倚瑟而弦歌。西京雜記

楊惲報孫會宗書曰婦趙女也雅善鼓瑟。漢書

唐盧邁有寶瑟四各直數十萬有寒玉石磬響泉和志之號。南部新書

熊朋來每燕居鼓瑟而歌以自樂著瑟賦二篇學者傳誦之。元史

箏

箏十三絃。所謂秦聲。隋書

安定西隴道其谷中有彈箏之聲行人聞之謂之彈箏谷。述異記

御史中丞何承天善彈箏。太祖賜以銀裝箏一面。宋書

孫紹兄世元早卒。世元善彈箏。紹後聞箏聲。便涕泗嗚咽。捨之而去。魏書

善箏者。元和至太和中。李青青及龍佐。大中以來。有常述本。亦妙手也。史從李從周。皆能者也。從周。卽青青孫。亞其父之藝也。樂府雜錄

琵琶

漢遣烏孫公主嫁昆彌。念其行道思慕。故使工裁箏筑爲馬上之樂。從方俗語。故名琵琶。風俗通曰。以手琵琶。因以爲名。宋書樂志

范曄善彈琵琶。能爲新聲。文帝欲聞之。曄僞若不曉。不肯爲。上嘗宴飲歡適。謂曰。我欲歌。卿可彈。曄乃奉旨。上歌旣畢。曄亦止絃。南史

褚淵善彈琵琶。世祖在東宮。賜淵金鏤柄銀柱琵琶。南齊書

開元中。有賀懷智。其琵琶以石爲槽。鵠雞筋作絃。用鐵撥彈之。貞元中。天門街市人闐聲樂。街東有康崑崙。琵琶最工。謂街西無以敵也。及崑崙度曲。西市出一女郎。撥聲如雷。其妙入神。崑崙驚駭。拜請爲師。女郎更衣出見。乃僧善本也。本姓段。翼日。德宗令段教授崑崙。後果盡段之藝。樂府雜錄

文宗朝。有內人鄭中丞。善琵琶。內庫二琵琶。號大小忽雷。以忤旨。命縊殺。投河中。浮出。爲梁厚本所得。救活爲妻。每至夜分。方敢輕彈。後遇良夜酒酣。不覺朗彈數曲。有黃門過其門。曰。此鄭中丞琵琶聲也。翼日達上聽。文宗驚喜。赦厚本罪。仍加賜焉。

廉郊師於曹鋼。盡鋼之能。嘗值風清月朗。携琵琶池上。彈蕤賓調。忽聞菱荷間有跳躍聲。遂加意朗彈。忽有一物鏘然躍出岸上。視之。乃方響一片。蓋蕤賓鐵也。以指撥。精妙律呂相應也。

楊志善琵琶。其姑尤妙絕。姑本宣徽弟子。後放出宮。於永穆觀中住。自惜其藝。每至夜方彈。志求教授。不允。乃賂觀主。寄宿於觀。竊聽記其節奏。遂得一兩曲。明日携樂器詣姑。姑大驚異。志告其事。姑意乃回。盡傳其能矣。

馮吉能彈琵琶。以皮爲絃。周世宗令彈御前。深喜之。號其琵琶曰

遶殿雷。

五代史補

明京師瞽者李近樓。籍錦衣千戶。善琵琶。能左右手彈。新聲古曲。

無不妙絕。耳談

修撰康海既罷免。楊侍郎廷儀過許西留飲甚懽。自起彈琵琶勸酒。楊言家兄在內閣。殊相念。何不以尺書通問。海發怒。擲琵琶撞之。楊走追而罵曰。吾豈效王維假作伶人。借琵琶討官做耶。獻徵錄

簫

舜作簫。其形參差象鳳翼。十管長三尺。風俗通

蕭史善吹簫。能致孔雀白鶴於庭。秦穆公以女弄玉妻之。蕭史曰。教弄玉作鳳鳴。鳳凰來止其屋。列仙傳

元帝多材藝。吹洞簫。漢書

晉咸寧中。盜發張駿冢。得赤玉簫。涼州記

恭獻賢妃權氏永樂時朝鮮貢女充掖庭妃與焉資質穠粹善吹玉簫帝愛憐之明史

管

帝舜時西王母獻白玉琯大戴禮

孤竹之管於園邱奏之孫竹之管於方邱奏之陰竹之管於宗廟

奏之周禮

穆王有岑華鏤管岑華山名有象竹截爲管吹之爲羣鳳之鳴拾遺

記

高祖入咸陽宮有玉管吹之則見車馬山林隱鱗相次銘曰昭華

之琯

西京雜記

漢章帝時零陵奚景於舜祠得白玉管宋書樂志

笛

融性好音律。能吹笛。而爲督郵。有雒客舍逆旅。吹笛爲氣出精列。相和。融聞而樂之。追慕王子淵等簫琴笙頌。惟笛獨無。故作頌。氣出

精列二古曲。

馬融長笛賦序

游楚好音樂。畜笛。每持以自隨。魏畧

武谿深。馬援南征所作。援門生袁寄生。善吹笛。援作歌以和之。古今注

桓伊善音樂。有蔡邕柯亭笛。常自吹之。王徽之泊舟青溪。伊於岸上過。徽之令人謂曰。聞君善笛。試爲我一奏。伊時已貴顯。素聞徽

之名。便下車。踞胡床爲作。三調弄畢。便上車去。客主不交一語。

晉書

笛。羗樂也。古有落梅花曲。開元中有李謨獨步當時。嘗月下汎鏡

湖吹笛。條有老父。汎小舟來聽。曰。某亦善此。謨以笛授之。老父始

奏一聲。波浪搖動。數疊之後。笛遂中裂。探懷中一笛以畢其曲。舟

下。二龍翼舟而聽。曲終。以笛付謨。謨吹之。竟不能聲。卽拜求其法。

頃刻老父入小舟。遂失所在。

樂府雜錄

歐陽迴爲散騎常侍。雅善長笛。太祖嘗召於便殿。令奏數曲。

宋史

喻明仲善於長笛。持節數郡。每出按行。至山水佳處。馬上臨風。輒

快作數弄。

世說

劉衡善吹鐵笛。有穿雲裂石之聲。胡寅贈以詩云。更煩橫鐵笛。吹

與衆仙聽 方輿記

琵琶峰下女子皆善吹笛。嫁時羣女子治具吹笛唱竹枝詞送之。
郡國志

宋嘉祐中王疇欲定大樂。嘗就成都房庶取玳瑁古笛以校金石。
天中記

黃子久公望自號大癡。吳人博學多能之士閤子靜徐子方趙松
雪諸公莫不友之。一日與客游孤山。聞湖中笛聲。子久曰。此鐵笛
聲也。少頃子久亦以鐵笛自吹下山。遊湖者吹笛上山。乃吾子行
也。二公略不相顧。笛聲不輟。交臂而去。一時興趣又過於桓伊也。

山居

新話

受玉類編

卷三十八 音樂類

卷三十八

楊基初會稽楊維禎客吳中以詩自豪基於座上賦鐵笛歌維禎驚喜與俱東語從游者曰吾在吳又得一鐵矣若曹就之學優於

老鐵學也

維禎號鐵崖。明史

笙

大笙謂之巢。小者謂之和。爾雅

我有嘉賓。吹笙鼓簧。

詩經

鄉飲酒之禮。笙入三終。主人獻之。

禮記

謝孺子善聲律。王或嘗與孺子宴桐臺。孺子吹笙。或自起舞。旣而

歎曰。眞使人飄飄有伊洛間意。

南史

李羣玉好吹笙。爲校書郎。東歸。盧肇贈詩云。妙吹應諸鳳。工書定

得鶯唐詩紀事

鼓

夷作鼓蓋起於伊耆氏世本

鼓人掌教六鼓之音聲以節聲樂以雷鼓鼓神祀以靈鼓鼓社祭以路鼓鼓鬼享以鼗鼓鼓軍事以鼙鼓鼓役事以晉鼓鼓金奏周禮

密須之鼓文所以大蒐也左傳

吳王夫差啟蛇門厭越越人爲雷門以禳之擊大鼓於雷門之下

而蛇門聞焉文獻通考

元帝好音樂或置鼙鼓殿下自臨軒檻上墮銅丸以撾鼓聲中嚴鼓之節後宮及左右習知音者莫能爲而定陶王亦能之漢書

王尊曰。毋持布鼓過雷門。

禰衡善擊鼓。曹操召爲鼓史。因大會賓客。閱試音節。衡爲漁陽參。搥蹀躞而前。聲節悲壯。聽者莫不慷慨。後漢書

武帝嘗召時賢。其言伎藝之事。王敦自言知擊鼓。因振袖揚枹。音節諧韻。神氣自得。旁若無人。舉坐歎其雄爽。晉書

蕭思話年十許歲。好騎屋棟。打細腰鼓。宋書

穀玉類編卷三十八

